

MESYUARAT KEDUA, PENGGAL PERTAMA
PARLIMEN KEEMPAT BELAS
2018

HARI KHAMIS : 18 OKTOBER 2018

**PERTANYAAN BAGI JAWAPAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHAN MING KAI
[ALOR SETAR]**

TARIKH : 18 OKTOBER 2018 (KHAMIS)

SOALAN NO.1

Minta **MENTERI PEMBANGUNAN USAHAWAN** menyatakan apakah mekanisme untuk mewujudkan pangkalan data peminjam MARA, TEKUN dan Amanah Ikhtiar supaya tidak berulang pinjaman kepada individu yang sama.

JAWAPAN

Tuan Yang di-Pertua,

Kementerian Pembangunan Usahawan (MED) telah mempunyai satu pangkalan data bersepadu yang terdiri daripada senarai benefisiari insentif dan bantuan kewangan yang disediakan oleh Kerajaan. Sistem yang telah dibangunkan oleh SME Corp. Malaysia dinamakan SCenlc (*SME Central Incentives System*) merupakan rujukan kepada Kementerian dan agensi untuk membuat keputusan yang tepat bagi pengagihan sumber / insentif yang berkesan dan yang bersasar.

Pangkalan data atau Scenlc ini akan:

- a) Meningkatkan ketelusan dalam menyediakan bantuan Kerajaan kepada PKS;
- b) membantu dalam proses pembuatan keputusan dalam menimbangkan kelulusan permohonan bantuan Kerajaan;
- c) mengenal pasti jurang dan membantu Kerajaan untuk mengukuhkan dasar pembangunan PKS; dan
- d) mengoptimumkan penggunaan sumber.

Melalui SCenlc juga, Kementerian dan Agensi boleh berkongsi data penerima insentif dan bantuan kewangan yang seterusnya mampu mengelakkan pemberian bantuan bagi projek yang sama berulang kepada sesebuah syarikat dan juga bertindih dalam permohonan bantuan. Selain daripada itu, SCenlc juga memberi akses kepada maklumat mengenai penerima bantuan Kerajaan dan insentif kepada Kementerian dan agensi bagi membantu menilai keberkesanan bantuan yang disediakan.

Pada masa ini, perbincangan telah diadakan dengan semua Kementerian dan agensi yang terlibat dengan pembangunan PKS, termasuk MARA, TEKUN dan Amanah Ikhtiar bagi penyertaan dalam SCenlc.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TAN SRI DATUK SERI PANGLIMA HAJI
ANNUAR BIN HAJI MUSA
[KETEREH]
TARIKH : 18 OKTOBER 2018 (KHAMIS)

SOALAN NO. 2

Y.B. TAN SRI DATUK SERI PANGLIMA HAJI ANNUAR BIN HAJI MUSA [KETEREH] minta **MENTERI KEWANGAN** menyatakan mengapakah masih wujud kekeliruan berkenaan pelaksanaan semula Cukai Jualan dan Perkhidmatan (SST) meskipun cukai ini telah digunakan sejak zaman 70an dan mengapakah setelah diperkenalkan semula ianya semakin membebankan dan mengelirukan pengguna.

JAWAPAN

Tuan Yang di-Pertua,

Kekeliruan di kalangan rakyat berkemungkinan adalah berkaitan dengan perbezaan skop kenaan GST dan SST, kadar cukai yang dikenakan serta kesan kedua-dua cukai ini kepada harga barangan. Untuk makluman Ahli Yang Berhormat, bilangan barangan yang dikenakan cukai jualan 5% dan 10% dan perkhidmatan yang dikenakan cukai perkhidmatan 6% adalah jauh lebih kecil berbanding GST.

Sekiranya ada kenaikan harga barangan berikutan pelaksanaan SST pada 1 September 2018, kesannya secara am pasti lebih kurang berbanding dengan peningkatan yang disebabkan oleh pelaksanaan GST pada 1 April 2015 kerana kutipan cukai SST adalah jauh lebih kurang berbanding dengan GST. Jangkaan kutipan hasil SST adalah sekadar RM21 bilion setahun berbanding dengan hasil GST sebanyak RM44 bilion yang dijangka dikutip pada tahun 2018. Ini bermaksud, beban cukai ke atas pengguna adalah jauh lebih rendah kerana RM23 bilion telah dikembalikan kepada rakyat dalam bentuk cukai yang lebih kecil. Kekurangan bayaran cukai ini tentu bermakna bahawa rakyat akan mempunyai lebih banyak wang untuk dibelanjakan berbanding dengan dahulu.

Perkara ini disebabkan oleh skop kenaan cukai sebanyak 60% daripada Bakul Barangan dan Perkhidmatan CPI (Indeks Harga Pengguna) yang lebih luas untuk GST berbanding dengan 38% daripada bakul tersebut di bawah SST; pengecualian sebanyak 5,443 item barangan dan perkhidmatan di bawah SST yang merupakan 10 kali ganda lebih besar daripada 545 item barangan yang dikecualikan di bawah GST; serta 11,197 barangan yang dikenakan cukai GST berbanding dengan 6,405 barangan yang dikenakan cukai SST.

Tuan Yang di-Pertua,

Sejak SST dilaksanakan pada 1 September 2018, Kementerian Kewangan

NO SOALAN : 2

dengan kerjasama Jabatan Kastam DiRaja Malaysia telah meneliti segala maklum balas dan rayuan daripada pihak berkepentingan sektor perdagangan dan industri dan membuat keputusan untuk mengecualikan beberapa barangan daripada dikenakan cukai SST serta menyemak semula kadar cukai jualan ke atas barangan tertentu. Antaranya, kad prabayar untuk telefon bimbit yang digunakan rakyat Malaysia, kacang tanah, komponen pemasangan tempatan (CKD) import untuk pemasangan kereta francais tempatan, ikan masin, ikan pekasam, ikan jeruk, ikan masam, makanan laut di dalam kategori *crustacean* dan *mollusk*, pewter, beg plastik untuk pembungkusan beras, sewa ruang pejabat di dalam restoran, serta kapal, feri dan bot yang digunakan untuk pengangkutan awam dikecualikan daripada dikenakan cukai SST.

Kerajaan juga telah membuat penyemakan semula kadar cukai jualan daripada 10 peratus kepada 5 peratus ke atas barangan kosmetik, produk kecantikan dan penjagaan kulit, aksesori telefon bimbit, jam, tayar celup, tayar pneumatik dan tiub motosikal. Proses semakan semula kadar cukai SST ini masih berterusan dan keputusan untuk barangan yang terpilih akan diumumkan selepas ia dimuktamadkan. Jelas sekali jumlah barangan dan perkhidmatan yang akan dicukai di bawah SST adalah jauh lebih kecil daripada semasa era GST. Penyelarasan ini adalah bertujuan untuk memastikan proses pengurusan lebih lancar dan juga lebih memudahkan perniagaan-perniagaan supaya dikenakan cukai bertindih dapat dielakkan.

Selain itu, perubahan harga ini tidak semata-mata dipengaruhi oleh faktor SST sahaja, tetapi juga disebabkan oleh faktor lain iaitu seperti masalah permintaan dan penawaran, kadar tukaran wang asing, harga pasaran minyak dunia dan margin keuntungan peniaga.

Kesemua faktor ini sedang dipantau dengan rapi oleh pihak kerajaan, khususnya aktiviti anti-pencatutan supaya kita dapat mengambil tindakan ke atas peniaga yang cuba mengambil kesempatan ini untuk menaikkan harga dengan sewenang-wenangnya untuk meraih keuntungan yang tidak munasabah. Dalam perkara ini, KPDNHEP telah menjalankan usaha penguatkuasaan untuk memastikan bahawa tiada peniaga yang cuba

NO SOALAN : 2

mengambil kesempatan seperti yang saya sebutkan. Pihak kerajaan juga memohon kerjasama daripada pihak rakyat dan pengguna untuk memberikan maklumat kepada pihak KPDNHEP sekiranya ada kegiatan yang tidak sihat seperti ini.

Sekian, terima kasih.

PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)
DEWAN RAKYAT

PERTANYAAN : LISAN

**DARIPADA : YB TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 18 OKTOBER 2018 (KHAMIS)

SOALAN:

Tuan Ahmad Fahmi bin Mohamed Fadzil [Lembah Pantai] minta **PERDANA MENTERI** menyatakan langkah-langkah reformasi institusi yang akan dilaksana Kerajaan, terutama berkait pengurusan dan pentadbiran masjid, surau Jumaat dan surau.

**JAWAPAN : (YB HAJJAH FUZIAH SALLEH, TIMBALAN MENTERI
DI JABATAN PERDANA MENTERI)**

Tuan Yang di-Pertua,

Langkah-langkah reformasi institusi merupakan keutamaan kerajaan Pakatan Harapan pada hari ini yang melibatkan 13 agensi agama di bawah Jabatan Perdana Menteri supaya dapat berfungsi dengan lebih efektif dan efisien. Sehubungan itu, bagi mengukuhkan kedudukan dan peranan institusi Islam di negara ini, Kerajaan sedang melaksanakan kajian bagi meneliti semua peranan dan fungsi agensi-agensi agama di peringkat Persekutuan antaranya ialah memastikan supaya agensi tidak akan bekerja secara bersendirian dan tidak berlaku pertindihan fungsi antara satu sama lain, memastikan agensi bergerak dengan dipacu oleh fungsi dan pengukuran keberhasilan sebagai contoh seperti berikut:

NO. SOALAN: 3

- i. Institusi Zakat - pengurusan zakat bukan sahaja tertumpu kepada pengumpulan zakat semata-mata, malah dari sudut pengurusan hasil kutipan zakat sehingga dapat mengeluarkan golongan asnaf dari kekangan hidup;
- ii. Institusi Wakaf – mempromosi institusi wakaf;
- iii. Pengurusan Ibadah Haji – pengurusan ibadah haji dan disiplin jemaah haji Malaysia adalah yang terbaik di dunia. Walau bagaimanapun, masih perlu penambahbaikan antaranya ialah dari sudut kebersihan khemah;
- iv. Pengurusan Industri Halal – kerajaan sedang menjalankan kajian bagi mewujudkan satu akta yang boleh menyelaras fungsi agensi-agensi yang terlibat dengan industri halal;
- v. Pengurusan Masjid dan surau - telah menyediakan garis panduan dalam usaha meningkatkan fungsi masjid dan surau di seluruh negara. Garis panduan ini meletakkan 3 kriteria utama untuk menentukan '*star rating*' sesebuah masjid iaitu:
 - a) pengurusan organisasi dan kewangan;
 - b) pengimaran dengan ibadat, aktiviti dan program serta khidmat komuniti;
 - c) kemudahan prasarana – kemudahan tempat ibadat, pentadbiran, keilmuan, dan kebajikan;
 - d) persekitaran - kebersihan, keceriaan dan keselamatan.

Selain itu, kerajaan juga akan melaksanakan program *Green Tech* – teknologi hijau di masjid terutama penggunaan kuasa solar serta penjimatan penggunaan air serta reka bentuk saintifik masjid yang mesra alam. Kesimpulannya, dalam melaksanakan reformasi institusi-institusi tersebut, dengan menjadikan kerangka maqasid syariah sebagai garis panduan untuk menjadikan Malaysia sebagai negara *benchmark* kepada pengurusan institusi agama. Sekian, terima kasih.

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT [JERAJ]

TARIKH : 18 OKTOBER 2018 (KHAMIS)

SOALAN NO. 4

Minta **MENTERI PENDIDIKAN** menyatakan apakah status terkini Program MyBrain dan apakah langkah penyelesaian bagi membantu para pemohon biasiswa tersebut.

JAWAPAN

Yang di-Pertua,

Terdapat satu pertanyaan lagi yang berhubung kait dengan program *MyBrain* Oleh itu, izinkan saya menjawab pertanyaan pada hari ini serentak dengan pertanyaan daripada:

- (i) YB Jerai pada hari ini; dan
- (ii) YB Bukit Gantang pada 23 Oktober 2018.

Untuk makluman Ahli Yang Berhormat, bagi penajaan di peringkat pasca siswazah yang terbuka kepada orang awam warganegara Malaysia, Kementerian Pendidikan Malaysia (KPM) ada menawarkan dua program penajaan iaitu *MyBrain15* dan *MyBrainSc* (MyBrain Science).

Program *MyBrain15* diwujudkan dengan matlamat meningkatkan bilangan pemegang PhD di Malaysia selaras dengan hasrat menjadikan Malaysia sebagai sebuah negara maju yang berpendapatan tinggi. Terdapat tiga jenis penajaan yang dilaksanakan di bawah program *MyBrain15* ialah *MyPhD*, *MyMaster* dan *MyPhD* Industri. Bagi program *MyBrainSc* pula, penajaan disediakan khusus bagi pengajian dalam bidang sains tulen iaitu fizik, kimia, biologi dan matematik di institusi pendidikan tinggi tempatan atau universiti terkemuka luar negara dengan objektif menghasilkan saintis muda dengan visi mencapai pengiktirafan sebagai *Nobel Laureate*.

Penawaran baharu bagi program *MyBrainSc* diteruskan bagi tahun 2018 berdasarkan peruntukan yang diluluskan di bawah belanjawan mengurus tahun 2018 bagi KPM. Manakala bagi program *MyBrain15* pula, tajaan bagi pelajar sedia ada juga turut diteruskan seperti biasa. Walau bagaimanapun, hanya penawaran baharu bagi program *MyBrain15* ditangguhkan sejak tahun 2017 selaras dengan perubahan dan kedudukan semasa kewangan Kerajaan. Selain program *MyBrain15* juga, KPM turut menguruskan 14 program penajaan lain dengan peruntukan sebanyak RM250 juta.

NO SOALAN : 4

Bersesuaian dengan kemampuan kewangan negara pada masa ini, KPM sentiasa memastikan program penajaan yang dilaksanakan sejajar dengan aspirasi Kerajaan serta bersandarkan kepada dasar dan keperluan terkini guna tenaga dan keperluan bakat. Langkah ini membolehkan program penajaan lebih berfokus, inklusif, menitikberatkan kualiti berbanding kuantiti sekaligus menepati keperluan pemegang taruh semasa.

RJM21

PEMBERITAHUAN PERTANYAAN MESYUARAT KEDUA,
PENGGAL PERTAMA, PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN WONG HON WAI
(BUKIT BENDARA)

TARIKH : 18 OKT 2018
(KHAMIS)

SOALAN:

Minta **MENTERI PERTAHANAN** menyatakan Dasar Pertahanan Negara berkenaan cabaran terbaru dari segi udara, laut, darat dan siber yang antara lainnya kelemahan dalam menangani isu pencerobohan Lahad Datu, respons yang lemah dalam nahas MH370, isu pelarian yang menyeludup masuk melalui sempadan serta cabaran baru siber.

PEMBERITAHUAN PERTANYAAN MESYUARAT KEDUA,
PENGGAL PERTAMA, PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : DATO' NGEH KOO HAM
(BERUAS)

TARIKH : 24 OKT 2018
(RABU)

SOALAN:

Minta **MENTERI PERTAHANAN** menyatakan sama ada Kerajaan berhasrat untuk membentangkan satu kertas putih di Parlimen bagaimana untuk memperkasakan angkatan tentera kita memandangkan Menteri Pertahanan telah menyatakan pertahanan negara kita adalah terlemah sekali di Asia Tenggara.

JAWAPAN

Tuan Yang di-Pertua,

Terlebih dahulu izinkan saya untuk menjawab soalan ini secara bersekali dengan pertanyaan yang dibangkitkan oleh YB Beruas pada tarikh 24 Oktober 2018, giliran no. 1, kerana isu yang dibangkitkan adalah sama iaitu berkaitan dengan Dasar Pertahanan Negara dan Kertas Putih Pertahanan.

Tuan Yang di-Pertua,

Dalam mendokong asas-asas demokrasi, Kerajaan Pakatan Harapan percaya bahawa pendekatan yang perlu diambil adalah berpaksikan kepada prinsip keterbukaan, tadbir urus yang baik, inklusif dan progresif.

Bagi memastikan Dasar Pertahanan Negara dapat menangani cabaran semasa dan akan datang, satu Kertas Putih Pertahanan akan disediakan dalam masa terdekat bagi menggariskan prinsip dan strategi pertahanan serta pelan pembangunan keupayaan ATM yang terkini untuk dibincangkan di Dewan yang mulia ini bagi memastikan kedaulatan negara dan keutuhan wilayah terpelihara.

Di dalam membina Kertas Putih Pertahanan ini, pendekatan yang akan diambil oleh Kementerian Pertahanan adalah bercirikan *the Whole-of-Government* dan *Whole-of-Society Approach*. Isu berkaitan dengan pertahanan dan keselamatan wajar dibincangkan secara terbuka untuk memastikan bahawa setiap lapisan masyarakat memahami kepentingan pertahanan dan keselamatan serta menggalas tanggungjawab secara bersama selaras dengan konsep Pertahanan Menyeluruh (HANRUH) di bawah Dasar Pertahanan Negara (DPN).

SOALAN NO. : 6

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN ROBERT LAWSON CHUAT [BETONG]

TARIKH : 18 OKTOBER 2018 (KHAMIS)

SOALAN NO. 6

Tuan Robert Lawson Chuat [Betong] minta **MENTERI AIR, TANAH DAN SUMBER ASLI** menyatakan berapakah peruntukan untuk membina infrastruktur kawalan banjir akibat air pasang bagi kampung tradisi yang terletak di tebingan sungai di Negeri Sarawak.

SOALAN NO. 6

JAWAPAN:

Tuan Yang di-Pertua,

Bagi mengatasi isu banjir akibat air pasang di seluruh Negeri Sarawak, Kementerian telah memohon peruntukan di dalam *Rolling Plan*, RP 4 (2019) RMKe 11 dengan anggaran kos RM350 juta. Permohonan ini termasuk kawasan kampung tradisi yang terletak di tebingan sungai di Negeri Sarawak. Permohonan ini masih di peringkat penilaian oleh Kementerian Hal Ehwal Ekonomi.

Sekian, terima kasih.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : TUAN SYED IBRAHIM BIN SYED NOH
[LEDANG]

TARIKH : 18 OKTOBER 2018 (KHAMIS)

SOALAN :

Tuan Syed Ibrahim bin Syed Noh [Ledang] minta MENTERI PEMBANGUNAN WANITA, KELUARGA DAN MASYARAKAT menyatakan apakah usaha Kerajaan dalam memberikan maklumat serta kesedaran kepada masyarakat tentang autisme di negara ini dan menggalakkan ibu bapa mendaftarkan anak autisme mereka.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : DATO' SRI HAJAH NANCY SHUKRI
[BATANG SADONG]

TARIKH : 15 NOVEMBER 2018 (KHAMIS)

SOALAN :

**Dato' Sri Hajah Nancy Shukri [Batang Sadong] minta MENTERI
PEMBANGUNAN WANITA, KELUARGA DAN MASYARAKAT**
menyatakan tindakan yang diambil Kementerian untuk meningkatkan
kesedaran mengenai autisme di kalangan masyarakat awam.

JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA DAN
MASYARAKAT

Tuan Yang di-Pertua,

Saya mohon izin untuk menjawab pertanyaan **YB Ledang** bertarikh 18 Oktober 2018 bersekali dengan pertanyaan **YB Batang Sadong** pada 15 November 2018 kerana pertanyaan-pertanyaan tersebut saling berkait.

Kanak-kanak autisme didaftarkan sebagai orang kurang upaya (OKU) di bawah kategori masalah pembelajaran (*Learning Disability*) oleh Kementerian melalui Jabatan Kebajikan Masyarakat (JKM) mengikut Seksyen 21 Akta Orang Kurang Upaya 2008.

Kementerian melalui JKM telah melaksanakan pelbagai program dalam usaha memberikan kesedaran kepada masyarakat tentang autisme dan menggalakkan ibu bapa mendaftarkan anak autisme mereka. Antaranya adalah:

i. **Kempen Pendaftaran Orang Kurang Upaya (OKU)**

Kempen pendaftaran OKU dilaksanakan secara berkala pada setiap tahun mengikut negeri atau zon melalui program kerajaan dimana JKM negeri dan daerah akan membuka *booth* untuk pendaftaran bagi meningkatkan kesedaran, kefahaman masyarakat, keluarga dan OKU, termasuk OKU autisme. Sehingga 30 September 2018, seramai **20,339 OKU** autisme telah berdaftar dengan JKM. Namun demikian, populasi autisme adalah dianggarkan seramai 1 nisbah 68 kanak-kanak iaitu hampir 9,000 kanak-kanak dilahirkan dengan autisme setiap tahun di Malaysia. Ini bermaksud, pemegang kad OKU autisme buat masa ini terlalu rendah.

Antara sebab kenapa ramai belum mendaftar sebagai OKU:-

- Autisme melibatkan *spectrum* yang luas. Bagi golongan *high functioning spectrum*, ramai ibu bapa percaya bahawa dengan adanya intervensi awal, kanak-kanak tersebut tidak perlu berdaftar sebagai OKU. Ramai yang tidak tahu bahawa kad OKU ini sebenarnya boleh dibatalkan atas pengesahan pegawai perubatan.
- Kekangan kekurangan liputan perlindungan insurans sekiranya anak berdaftar sebagai OKU.

- Saringan menyeluruh di semua fasiliti kerajaan yang mengambil masa hampir setahun untuk mengesahkan autisme
- Masalah stigma dalam komuniti terhadap golongan berdaftar OKU
- Kekurangan kesedaran di kalangan ibu bapa mengenai simptom autisme kerana autisme melibatkan gangguan perkembangan komunikasi, tingkah laku, kemampuan sosial dan belajar yang tidak mudah dikenal pasti tanpa saringan.

ii. Menyokong Kempen *#LightItUpBlue* Sempena Sambutan Hari Kesedaran Autisme Sedunia pada setiap 2 April

iii. Pusat Permata Kurnia

Pusat Permata Kurnia menyediakan program intervensi sepenuh masa untuk kanak-kanak autisme yang berusia antara 4 hingga 6 tahun sebagai persediaan untuk memasuki sekolah aliran perdana. Namun demikian, pusat ini tidak dapat menampung senarai menunggu yang panjang. Walaupun kapasiti sebenar pusat Permata Kurnia adalah seramai 300 orang namun bilangan sedia ada telah mencecah 475 orang. Senarai menunggu lebih kurang 200 orang.

Kerajaan dalam proses menambah 3 lagi Pusat Permata Kurnia di Melaka, Alor Setar, Kedah (masih dalam perbincangan untuk tapak bersama KKM) dan Putrajaya.

Kami menyeru semua pihak berkuasa tempatan dan Kerajaan Negeri untuk sama-sama membantu mempercepatkan proses perwujudan pusat intervensi awal seperti ini.

iv. Penyebaran Maklumat Autisme Melalui Media Massa

JKM bekerjasama dengan pihak penyiaran seperti di televisyen dan radio dalam penyebaran maklumat berkaitan autisme. Sebagai contoh Pegawai Jabatan Kebajikan Masyarakat menjadi tamu di televisyen seperti Selamat Pagi Malaysia, Wanita Hari Ini, dan tamu di radio seperti Radio Nasional dan IKIM (Institut Kefahaman Islam Malaysia) bagi menyebarkan maklumat.

v. Program *Disability Equality Training (DET)* dan *Disability Related Services Training (DRST)*

Kedua-dua program ini merupakan antara program bulanan utama dan berkala JKM kepada OKU, majikan dan orang awam dalam

memberikan advokasi dan menyebarkan maklumat berkaitan konsep sebenar ketidakupayaan dan meningkatkan kefahaman masyarakat untuk menyantuni semua OKU termasuk OKU autisme. Bilangan DET yang telah dijalankan sehingga September 2018 yang meliputi 805 peserta menerusi 18 kursus di seluruh negara dan pelbagai agensi.

Usaha dan inisiatif berterusan ini adalah bukti pihak kerajaan melalui Kementerian sentiasa prihatin dalam memberikan maklumat serta kesedaran kepada masyarakat tentang autisme di Negara ini. Dengan peningkatan kesedaran ini juga adalah diharapkan lebih ramai ibu bapa atau penjaga serta masyarakat mendaftarkan anak atau ahli keluarga mereka dan seterusnya menikmati kemudahan yang disediakan.

Langkah seterusnya

Kementerian berharap lebih banyak pertubuhan bukan kerajaan (NGO) dan kumpulan sokongan Ibu bapa (*Parents Support Group*) akan tampil untuk menyediakan perkhidmatan *Early Intervention Programme* (EIP) kepada kanak-kanak yang mengalami Autisme.

JKM juga sedang mempertimbangkan permintaan ramai ibu bapa untuk mewujudkan sub-kategori autisme di dalam kad OKU yang membolehkan mereka mengakses perkhidmatan yang lebih spesifik.

Kesimpulannya, kesedaran autisme masih rendah di kalangan masyarakat dan tidak seharusnya dilihat sebagai beban kerana ada ramai kanak-kanak autisme yang berbakat (*gifted children*) dan memiliki kemahiran luar biasa.

Harapan Kementerian adalah supaya akses kepada saringan awal dan saringan menyeluruh dipermudahkan dan fasiliti intervensi awal dapat dipertingkatkan.

NO. SOALAN : 8

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' ROSOL BIN WAHID
[HULU TERENGGANU]**

TARIKH : 18 OKTOBER 2018 (KHAMIS)

SOALAN NO. 8

Minta **MENTERI PENGANGKUTAN** menyatakan apakah langkah-langkah yang telah dan akan diambil bagi memastikan sasaran melatih 3,000 profesional melalui penubuhan National Rail Centre of Excellence (NRCE) dapat diteruskan.

JAWAPAN:

Yang Dipertua,

1. Untuk makluman Yang Berhormat, cadangan penubuhan National Railway Center of Excellent (NRCE) telah dicetuskan berikutan perkembangan pesat industri rel Negara. Dianggarkan dalam tempoh 10 tahun akan datang, industri rel bakal menjana permintaan yang tinggi terhadap tenaga kerja professional, mahir dan separa mahir dalam bidang operasi, pembuatan dan pengurusan perkeretapiannya. Justeru penubuhan NRCE dijangkakan boleh memastikan tenaga mahir dalam perkhidmatan dapat dihasilkan sejajar dengan matlamat menjadikan sektor pengangkutan awam terus berdaya saing dan berdaya maju.
2. Namun begitu, bagi mengelakkan pembaziran sumber serta pertindihan fungsi dengan mana-mana pihak berkaitan, Kerajaan pada 6 April 2018 telah bersetuju supaya penubuhan NRCE ditangguhkan sehingga kajian terperinci dilaksanakan.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN JONATHAN YASIN
[RANAU]**

TARIKH : 18 OKTOBER 2018 (KHAMIS)

SOALAN : 9

minta **MENTERI PEMBANGUNAN LUAR BANDAR** menyatakan berdasarkan kepada Penyiasatan Pendapatan Isirumah (HIS) 2016, insiden kemiskinan di Sabah masih lagi tinggi pada tahap 2.9% dengan Kadar Kemiskinan Tegar tertinggi di Malaysia. Ini antara lainnya disebabkan oleh kekurangan kemudahan seperti jalan raya, bekalan elektrik dan air bersih di kawasan luar bandar serta pedalaman Sabah. Maka, apakah perancangan Kerajaan Persekutuan untuk mempercepatkan lagi penyediaan kemudahan infrastruktur di kawasan luar bandar dan pedalaman Sabah dan berapakah peruntukan yang disediakan dalam RMK-11, 2016-2020.

JAWAPAN

Tuan Yang Di-Pertua,

Untuk makluman Yang Berhormat, Kementerian sentiasa bekerjasama dengan Kerajaan Negeri bagi memastikan setiap penduduk mendapat bekalan air terawat, bekalan elektrik 24 jam dan juga akses jalan luar Bandar yang sempurna dan selesa.

Bagi Rancangan Malaysia Kesebelas (RMKe-11) (2016 sehingga 2020) siling sebanyak RM7.24 billion telah ditetapkan bagi pembangunan infrastruktur luar bandar Negeri Sabah yang meliputi pembinaan jalan kampung, jalan luar bandar, bekalan air, bekalan elektrik dan ameniti sosial. Pecahan siling peruntukan adalah seperti berikut:

BIL.	PROGRAM	PERUNTUKAN RMKE-11 (2016-2020)
i.	Jalan Perhubungan Desa (JPD)	RM270 juta
ii.	Program Ameniti Sosial (PAMS)	RM54 juta
iii.	Bekalan Air Luar Bandar (BALB)	RM2.4 billion
iv.	Bekalan Elektrik Luar Bandar (BELB)	RM1.8 billion

Manakala bagi projek Jalan Luar Bandar (JALB) pula, Kerajaan telah memperuntukkan siling sejumlah RM2.75 billion dari tahun 2016 hingga 2018 bagi pelaksanaan projek JALB di negeri Sabah.

Kementerian juga bekerjasama dengan pihak Kerajaan Negeri yang melibatkan Unit Perancang Ekonomi Negeri (UPEN), Kementerian Pembangunan Infrastruktur Sabah (KPI), Kementerian Pembangunan Luar Bandar Sabah (KPLB), Jabatan Kerja Raya (JKR) Negeri Sabah, Jabatan Air Negeri Sabah (JANS), Sabah Electricity Sdn. Bhd. (SESB) dan juga Pejabat Daerah dalam perancangan pelaksanaan projek.

SOALAN NO : 9

Walau bagaimanapun, sekiranya terdapat keperluan mendesak, dimohon Yang Berhormat untuk mengemukakan keperluan tersebut kepada Kerajaan Negeri untuk disenaraikan sebagai senarai keutamaan negeri. Pihak Kementerian akan meminta agensi yang berkaitan menjalankan siasatan tapak dan semakan kos sebelum diangkat kepada pihak Unit Perancang Ekonomi (EPU) untuk kelulusan dan dilaksanakan di bawah *Rolling Plan* akan datang.

Walau bagaimanapun, pelaksanaan projek ini adalah tertakluk kepada kelulusan oleh pihak EPU dan kedudukan semasa kewangan kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN ABDUL LATIFF BIN ABDUL
RAHMAN [KUALA KRAI]**

TARIKH : 18 OKTOBER 2018 (KHAMIS)

SOALAN NO. 10

Minta **MENTERI PELANCONGAN, SENI DAN BUDAYA** menyatakan adakah Kementerian bercadang membangunkan kawasan peranginan di kawasan Kuala Krai seperti Lata Rek, Lata Berangin, Gua Ikan, Sungai Kenerong dan Gunung Stong yang mempunyai air terjun yang cantik, jernih, dan masih terpelihara.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pelancongan, Seni dan Budaya sentiasa bekerjasama rapat dengan Kerajaan Negeri Kelantan dalam mempertimbangkan sebarang cadangan bagi membangun dan menaiktaraf tempat pelancongan di seluruh negeri tersebut yang berpotensi untuk memastikan produk pelancongan negeri Kelantan termasuklah di Kuala Krai dapat memberi faedah kepada masyarakat tempatan dan ekonomi negara.

Bagi konteks pembangunan pelancongan di Kuala Krai, Kementerian berhasrat untuk membangunkan produk-produk berbentuk ekopelancongan yang mempunyai tarikan tersendiri di kawasan tersebut selaras dengan Pelan Ekopelancongan Kebangsaan 2016-2025. Sehubungan ini, Kementerian ini telah mengenal pasti Kluster Ekopelancongan Pergau-Jeli-Gunung Stong-Nenggiri sebagai produk pelancongan baharu untuk dibangunkan. Menerusi pembangunan kluster ekopelancongan ini, aktiviti ekopelancongan dan aktiviti berasaskan *Community-Based Tourism* (CBT) dapat dikembangkan serta dipromosikan secara lebih holistik.

Tuan Yang di-Pertua,

Selain pelan pembangunan Kluster Ekopelancongan Pergau-Jeli-Gunung Stong-Nenggiri, Kementerian juga telah memperuntukkan sebanyak RM28.8 juta bagi melaksanakan 49 buah projek pembangunan pelancongan di negeri Kelantan di bawah Rancangan Malaysia Kesembilan dengan RM4.4 juta daripadanya digunakan untuk membiayai tujuh (7) buah projek di kawasan Kuala Krai. Projek yang terlibat adalah:

NO. SOALAN : 10

1. Projek Menaiktaraf Taman Rekreasi Rimba Gua Ikan, Dabong (RM1.5 juta);
2. Peningkatan Kemudahan Pelancongan di Kawasan Perkelahan Stong, Dabong (RM1.99 juta);
3. Menaiktaraf Kawasan Perkelahan Lata Rek, Kuala Krai (Fasa 10) (RM179 ribu);
4. Menaiktaraf Kemudahan Infrastruktur Pelancongan Air Terjun Lata Janggut (Fasa 1) (RM189 ribu);
5. Menaiktaraf Kemudahan Pelancongan Bersejarah Tangga Bradley, Kuala Krai (Fasa 1) (RM199 ribu);
6. Menaik Taraf Kemudahan Pelancongan di Lata Kertas, Kampung Stong Dabong, Kuala Krai (Fasa 3) (RM160 ribu); dan
7. Membina *Canopy Walk* di Taman Burung Kuala Krai (Fasa 4) (RM162 ribu).

Sekian, terima kasih.

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 18 OKTOBER 2018 (KHAMIS)

SOALAN NO. 11

Minta **MENTERI PENDIDIKAN** menyatakan rancangan dan/atau langkah-langkah Kementerian untuk menyelesaikan masalah sekolah-sekolah mubaligh yang sedang menanggung kos operasi bulanan yang tinggi.

JAWAPAN

Yang di-Pertua,

Untuk makluman Ahli Yang Berhormat, sekolah mubaligh terdiri daripada sekolah kebangsaan dan sekolah menengah kebangsaan yang pada asalnya telah ditubuhkan oleh mubaligh Kristian. Kebanyakan sekolah mubaligh berstatus sekolah bantuan kerajaan (SBK). Sekolah ini beroperasi di atas tanah hak milik gereja, persendirian, tanah pajakan kerajaan negeri atau tanah pajakan Pesuruhjaya Tanah Persekutuan (PTP).

Bagi sekolah mubaligh bertaraf SBK, peruntukan yang disalurkan adalah di bawah emolumen, bantuan persekolahan dan pembayaran bil utiliti (tertakluk kepada maksima RM 2,000 mulai 1 Januari 2011). Walau bagaimanapun, bermula tahun 2015, nilai pembiayaan telah dinaikkan berdasarkan bil sebenar dan tidak melebihi RM5,000 sebulan.

KPM telah mengenal pasti bahawa antara punca bil utiliti di sekolah mubaligh melambung tinggi adalah disebabkan oleh penggunaan fasiliti seperti pendingin hawa yang di luar daripada skop fasiliti sekolah kerajaan. Oleh yang demikian, saranan KPM kepada pihak LPS agar mendapatkan kebenaran terlebih dahulu daripada KPM sebelum menyediakan sebarang fasiliti tambahan untuk sekolah dan menggalakkan pihak sekolah agar mengambil langkah berjimat cermat agar tidak dibebani dengan kos utiliti yang tinggi.

Menyedari tentang permasalahan ini, KPM akan mengadakan perbincangan dengan Kementerian Tenaga, Sains, Teknologi, Alam Sekitar dan Perubahan Iklim (MESTECC) bagi mencari formula dan kaedah yang sesuai agar isu ini dapat diselesaikan dengan cara yang terbaik.

RJM17

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAJI IDRIS BIN JUSOH [BESUT]

TARIKH : 18 OKTOBER 2018 (KHAMIS)

SOALAN NO. 12

Minta **MENTERI PENDIDIKAN** menyatakan status pembangunan Kota Kinabalu Tourism Academy @ Kolej Komuniti Kota Kinabalu, Sabah dan bilakah institusi tersebut dapat beroperasi sepenuhnya.

JAWAPAN

Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah melaksanakan perolehan pembelian bangunan Hotel Airport View, Kota Kinabalu untuk dijadikan Kota Kinabalu Tourism Academy (KKTA) atau Kolej Komuniti Kota Kinabalu pada tahun 2017. Pada Februari 2018, KPM menyerahkan kuasa pelaksanaan kerja-kerja ubahsuai kepada Jabatan Kerja Raya Malaysia (JKR) dan status terkini pelaksanaan projek adalah di peringkat tender pra-kelayakan. Berdasarkan perancangan KKTA dijangka akan mula beroperasi sepenuhnya pada Jun 2021.

RJM16

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATO' NGEH KOO HAM
[BERUAS]**

TARIKH : 18 OKTOBER 2018

SOALAN : 13

Dato' Ngeh Koo Ham [Beruas] minta **PERDANA MENTERI** menyatakan bilakah Kerajaan berhasrat untuk mengamalkan sistem layak menjadi pengundi secara automatik apabila seorang warganegara sudah mencapai umur 21 tahun.

JAWAPAN: YB DATUK LIEW VUI KEONG
MENTERI DI JABATAN PERDANA MENTERI

Tuan Yang Dipertua,

Sebagaimana Ahli Yang Berhormat sedia maklum, YAB Perdana Menteri Tun Dr. Mahathir Mohamed semasa membentangkan usul mengenai Kajian Separuh Penggal Rancangan Malaysia Ke 11 telah mengumumkan bahawa had umur mengundi akan diturunkan kepada 18 tahun sebagaimana yang terdapat dalam Tonggak 1, Keutamaan Pertama: Menambah Baik Tadbir Urus pada Semua Peringkat.

Sekian, terima kasih.

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : TUAN ANYI NGAU [BARAM]

TARIKH : 18 OKTOBER 2018 (KHAMIS)

SOALAN NO. 14

Minta **MENTERI PENDIDIKAN** menyatakan rancangan Kementerian mengatasi sekolah kurang murid di kawasan pendalaman Sarawak dan nyatakan faktor atau syarat yang menjadi asas pertimbangan rancangan tersebut.

JAWAPAN

Yang di-Pertua,

Untuk makluman Ahli Yang Berhormat, terdapat sebanyak 841 buah sekolah berstatus sekolah kurang murid (SKM) di negeri Sarawak iaitu sekolah yang mempunyai enrolmen 150 dan ke bawah. Daripada jumlah tersebut daerah Baram mempunyai sebanyak 60 buah sekolah yang termasuk dalam kategori SKM.

Di bawah Pelan Hala Tuju SKM, terdapat dua (2) strategi yang telah dicadangkan untuk mengatasi isu penurunan enrolmen murid di bawah 150 orang. Strategi jangka pendek ialah pelaksanaan kelas bercantum bagi sekolah berenrolmen di bawah 30 orang. Manakala strategi jangka panjang iaitu pemindahan ke lokasi baharu yang boleh membantu peningkatan enrolmen serta penggabungan sekolah. Walau bagaimanapun, sebelum melaksanakan strategi pemindahan dan penggabungan sekolah tersebut, beberapa perkara perlu diambil kira seperti pertimbangan tentang jarak, kemudahan pengangkutan, kesediaan kanak-kanak untuk bersekolah di sekolah baharu serta persetujuan komuniti setempat. Bagi sekolah bantuan kerajaan pihak Lembaga Pengelola Sekolah (LPS) bertanggungjawab untuk menyediakan tapak di lokasi baharu serta membiayai kos perpindahan dan pembinaan bangunan di tapak baharu.

Berdasarkan Pelan Tindakan Penggabungan Sekolah bagi negeri Sarawak yang telah dibentangkan oleh Jabatan Pendidikan Negeri (JPN) Sarawak didapati bahawa terdapat keperluan untuk sekolah berstatus SKM berada di kawasan sedia ada disebabkan oleh faktor fizikal serta penempatan komuniti yang memerlukan sebuah sekolah di kawasan tersebut.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : TUAN JUGAH ANAK MUYANG @
TAMBAT [LUBOK ANTU]**

TARIKH : 18 OKTOBER 2018 (KHAMIS)

SOALAN : 15

PR-1412-L01948

TUAN JUGAH ANAK MUYANG @ TAMBAT [LUBOK ANTU] minta **MENTERI KOMUNIKASI DAN MULTIMEDIA** menyatakan untuk menambahkan menara pancaran telekomunikasi di Kawasan Lubok Antu memandangkan masih banyak kawasan tidak dapat dihubungi melalui telefon.

JAWAPAN

Tuan Yang di-Pertua,

1. Untuk makluman Ahli Yang Berhormat, penambahbaikan liputan komunikasi terutama di kawasan luar bandar merupakan usaha yang berterusan dilakukan oleh pihak Kerajaan. Kementerian melalui Suruhanjaya Komunikasi dan Multimedia Malaysia (SKMM) sedang melaksanakan inisiatif Peluasan Liputan Selular dan Jalur Lebar Mudah Alih di kawasan yang kurang diberi perkhidmatan di seluruh negara termasuk di Parlimen Lubok Antu. Inisiatif ini melibatkan pembinaan menara komunikasi baharu dan penaiktarafan menara komunikasi sedia ada kepada perkhidmatan jalur lebar mudah alih 3G.
2. Di bawah projek Jalur Lebar Pinggir Bandar (SUBB) yang menyediakan perkhidmatan jalur lebar talian tetap dengan kelajuan sehingga 20 Megabit sesaat. Sebanyak 423 ibusawat telah berjaya dinaiktaraf di seluruh negara termasuk 1 ibusawat yang terletak di Lubok Antu.
3. Sehingga kini, terdapat 7 buah menara komunikasi baharu sedang dibina di kawasan Lubok Antu bagi menyediakan liputan jalur mudah alih kepada pengguna. Perancangan adalah memastikan 7 buah menara ini dijangka akan siap beroperasi pada suku kedua 2019. Ini adalah tambahan kepada 39 buah menara komunikasi baharu yang telah siap dibina dan beroperasi di kawasan Lubok Antu.
4. Kerajaan sentiasa berusaha menambahbaik kualiti perkhidmatan komunikasi melalui pelbagai inisiatif; antaranya projek Jalur Lebar Talian Tetap, Peluasan Liputan Selular dan Jalur Lebar Mudah Alih di seluruh negara termasuk di Kawasan Lubok Antu Sarawak.

NO. SOALAN : 16

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB TUAN AHMAD TARMIZI BIN
SULAIMAN [SIK]**

TARIKH : 18 OKTOBER 2018 (KHAMIS)
MENJAWAB

SOALAN : 16

YB Tuan Ahmad Tarmizi bin Sulaiman [Sik] minta **PERDANA
MENTERI** menyatakan apakah dasar sekularisme dan liberalisme
pentadbiran Kerajaan akan sepenuhnya diterapkan khususnya dalam
ekonomi dan undang-undang sivil di negara ini.

JAWAPAN: YB DATUK LIEW VUI KEONG

MENTERI DI JABATAN PERDANA MENTERI

Tuan Yang di-Pertua,

1. Apa-apa dasar yang hendak dilaksanakan oleh Kerajaan termasuk dasar mengenai ekonomi dan undang-undang sivil di negara ini hendaklah selaras dengan peruntukan Perlembagaan Persekutuan.

2. Sehubungan dengan itu Fasal (1) Perkara 3 Perlembagaan Persekutuan memperuntukkan agama Islam sebagai agama bagi Persekutuan seperti yang berikut:

“3. (1) Islam ialah agama bagi Persekutuan; tetapi agama-agama lain boleh diamalkan dengan aman dan damai di mana-mana bahagian Persekutuan.”.

3. Kerajaan juga mempunyai kewajipan untuk memelihara dan mempertahankan kedudukan agama Islam sebagai agama bagi Persekutuan pada setiap masa selaras dengan lafaz sumpah Yang di-Pertuan Agong dalam Jadual Keempat Perlembagaan Persekutuan.

5. Walau bagaimanapun pemakaian undang-undang Islam dalam konteks Perlembagaan Persekutuan hanya terhad kepada perkara-perkara tertentu sebagaimana yang diperuntukkan di bawah Perlembagaan Persekutuan iaitu hal perkara yang berkenaan dengan undang-undang persendirian seperti hal perkara berkaitan perkahwinan, perceraian dan perwarisan (*inheritance*) bagi orang yang beragama Islam.

6. Malaysia mengamalkan prinsip kedaulatan undang-undang (*supremacy of law*) dan demokrasi berparlimen. Fasal (1) Perkara 4 Perlembagaan Persekutuan memperuntukkan seperti yang berikut:

“4. (1) Perlembagaan ini ialah undang-undang utama Persekutuan dan apa-apa undang-undang yang diluluskan selepas Hari Merdeka yang tidak selaras dengan Perlembagaan ini adalah tidak sah setakat ketidakselarasan itu.”

7. Kedudukan Perlembagaan Persekutuan sebagai undang-undang utama Persekutuan turut dinyatakan oleh Raja Azlan Shah, Ketua Hakim Negara ketika itu, dalam kes **Loh Kooi Choon v Government of Malaysia** [1977] 2 MLJ 187.

8. Kesimpulannya apa-apa dasar yang hendak dilaksanakan dalam pentadbiran Kerajaan hendaklah selaras dengan peruntukan Perlembagaan Persekutuan sebagai undang-undang utama Persekutuan.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB TUAN OSCAR LING CHAI YEW

TARIKH : 18 OKTOBER 2018

SOALAN :

Tuan Oscar Ling Chai Yew [Sibu] minta **MENTERI TENAGA MANUSIA** menyatakan apakah program atau strategi yang boleh dilaksanakan bagi mengekalkan sumber bakat orang-orang muda di Sibu kerana Sibu tidak mempunyai peluang kerja yang mencukupi atau yang menarik untuk orang muda dan ia telah menjadi sebuah pekan orang tua.

PR-1412-L02650

JAWAPAN

Tuan Yang Di Pertua,

1. Program Karnival Kerjaya iaitu satu program yang menemukan para majikan dengan para pencari kerja dan program-program seumpamanya yang dianjurkan oleh Jabatan Tenaga Kerja Sarawak (JTK Sarawak) pada setiap tahun sememangnya memfokuskan kepada Bahagian/Daerah yang mempunyai kapasiti penduduk yang ramai seperti Sibu. Namun, dalam masa yang sama, turut memberikan peluang yang sama kepada penduduk tempatan yang tinggal di Bahagian/Daerah yang kecil.

2. Bagi tahun 2018, Program Karnival Kerjaya Peringkat Bahagian Sibu telah dirancang untuk dilaksanakan pada 13 Oktober 2018 (Sabtu) bertempat di Dewan Suarah Sibu, Sibu bermula jam 8.00 pagi hingga 5.00 petang. Seramai 20 majikan tempatan termasuk majikan dari luar Bahagian Sibu akan menyertai program ini dan mengadakan aktiviti temu duga terbuka semasa program berlangsung.

3. Promosi program ini akan dilaksanakan secara meluas iaitu melalui penggantungan *banner* program di beberapa kawasan tumpuan, hebahan melalui stesen radio tempatan dalam bahasa Melayu dan bahasa Iban serta hebahan secara dalam talian melalui laman sesawang rasmi JTK Sarawak serta juga menggunakan media

sosial untuk menarik minat para belia di Sibu khususnya untuk hadir melalui platform laman sosial *Facebook* JTK Sarawak.

4. Pada tahun 2017, melalui penganjuran Jelajah Kerjaya dan Minggu Jelajah Kerjaya sejumlah 4,719 pencari kerja telah berjaya ditempatkan melalui penganjuran program tersebut. Menerusi khidmat *JobsMalaysia Centre (JMC)* dan *JobsMalaysia Point (JMP)* seluruh Sarawak, JTK Sarawak berjaya menempatkan 13,374 orang pencari kerja.

5. Bagi program Minggu Kerjaya Kenyalang melibatkan 5 lokasi iaitu Bintulu, Bekenu, Marudi, Limbang dan Lawas menawarkan 11,876 jawatan kosong dan telah berjaya menempatkan 2,596 orang pencari kerja.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

**DARIPADA : DATO' SRI HAJAH ROHANI BINTI HAJI ABDUL
KARIM [BATANG LUPAR]**

TARIKH : 18 OKTOBER 2018 (KHAMIS)

SOALAN :

**Dato' Sri Hajah Rohani binti Haji Abdul Karim [Batang Lupar] minta
MENTERI PEMBANGUNAN WANITA, KELUARGA DAN
MASYARAKAT** menyatakan mengenai dasar serta program KPWKM
bagi persediaan Malaysia sebagai Negara Penuaan (*Aged Nation*)
menjelang tahun 2030. Apakah tindakan yang diambil untuk
melengkapkan penduduk negara kita bila ditakrif sebagai Negara
Penuaan. Sudahkah KPWKM membuat perbandingan dengan negara-
negara yang telah ditakrif sebagai Negara Penuaan sebagai persediaan
awal.

JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA
DAN MASYARAKAT

Tuan Yang di-Pertua,

Berdasarkan kepada data unjuran penduduk oleh Jabatan Perangkaan Malaysia, negara kita akan mencapai status negara tua pada tahun 2030 dengan jumlah warga emas seramai 5.80 juta orang atau 15.3 peratus daripada jumlah penduduk.

Bagi persiapan ke arah menghadapi negara mencapai status negara tua, Kerajaan telah mengambil langkah awal dengan menggubal Dasar Warga Tua sejak tahun 1995. Dasar tersebut telah disemak semula dan dipinda pada tahun 2011 selaras dengan perubahan demografi, keperluan semasa dan cabaran masa hadapan. Di samping itu, Dasar dan Pelan Tindakan Warga Emas Negara (PTWEN) juga telah digubal dan dilaksanakan bagi tempoh sepuluh tahun iaitu dari tahun 2011 hingga tahun 2020. Kementerian sedang dalam proses menyemak semula Pelan Tindakan Warga Emas Negara (PTWEN), 2018-2030 bagi menambah

baik perancangan program/aktiviti serta pelaporan dan pemantauan PTWEN. Selain itu, Kementerian juga sedang meneliti cadangan untuk mewujudkan satu akta khusus untuk warga emas bagi melindungi kebajikan dan hak asasi golongan tersebut.

Tuan Yang di-Pertua,

Inisiatif lain juga termasuk Program Khidmat Bantu Rumah (*Home Help*), Pusat Aktiviti Warga Emas (PAWE) dan Program Intergenerasi untuk menggalakkan penjagaan berasaskan komuniti; pembelajaran sepanjang hayat dalam kalangan warga emas; pemberian Bantuan Orang Tua (BOT) sebanyak RM350 sebulan seorang; perlepasan cukai kepada anak-anak untuk penjagaan dan rawatan perubatan ibu dan bapa; mempromosi dan melaksanakan advokasi bagi mewujudkan imej warga emas yang positif dan aktif; mempertingkatkan kemudahan yang mesra warga emas; menambah baik standard perkhidmatan jagaan kesihatan; meningkatkan keselamatan sosial termasuk meningkatkan peluang pekerjaan; serta memperbanyakkan kajian mengenai isu penuaan.

Antara kajian utama yang telah dilaksanakan adalah Kajian Kemudahan dan Perkhidmatan bagi Menepati Keperluan Warga Emas di Malaysia

Menjelang 2030 oleh MyAgeing, UPM pada tahun 2017. Salah satu skop kajian ini adalah **membuat perbandingan sistem kemudahan dan perkhidmatan warga emas** yang disediakan oleh lima (5) negara lain yang merupakan negara tua iaitu United Kingdom, Sweden, Australia, Jepun dan Thailand. Antara penemuan utama adalah bahawa penyediaan kemudahan dan perkhidmatan warga emas adalah di bawah tanggungjawab pihak berkuasa tempatan berbanding dengan Malaysia yang lebih bergantung kepada kerajaan pusat. Negara lain turut mempunyai model pembiayaan perkhidmatan jagaan kesihatan yang komprehensif contohnya *long-term care insurance*. Kemasukan ke kemudahan atau perkhidmatan berkediaman mengikut tahap penjagaan berbeza juga adalah berasaskan penilaian profesional. Persamaan yang didapati antara Malaysia dan negara-negara tersebut adalah fokus dan usaha Kerajaan ke arah penjagaan serta inisiatif berkaitan warga emas berasaskan komuniti.

Tuan Yang di-Pertua,

Kementerian ingin menekankan di sini bahawa tanggungjawab bagi menjamin kesejahteraan warga emas merupakan peranan semua lapisan masyarakat serta memerlukan **komitmen dan kolaborasi sepenuhnya**

di peringkat Kerajaan Persekutuan, Kerajaan Negeri, Pihak Berkuasa Tempatan (PBT), swasta, ahli akademik, NGO, komuniti, keluarga dan warga emas sendiri. Kementerian akan terus komited untuk bekerjasama dengan semua pihak ke arah persediaan sebagai negara tua. Kementerian juga amat mengalu-alukan Ahli-Ahli Parlimen untuk bekerjasama dengan JKM negeri dan daerah untuk menyediakan program warga emas yang sesuai dengan demografi komuniti setempat.

PEMBERITAHU PERTANYAAN DEWAN RAKYAT

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 18 OKTOBER 2018 (KHAMIS)

SOALAN NO. 19

Minta **MENTERI PENDIDIKAN** menyatakan apakah langkah yang diambil tindakan oleh Kementerian untuk mengatasi masalah kekurangan guru disekolah-sekolah Tamil yang serius dan akan menurun umpamanya tiada guru pengganti jika terdapat guru yang mengambil cuti bersalin.

JAWAPAN

Yang di-Pertua,

Untuk makluman Ahli Yang Berhormat, Sekolah Jenis Kebangsaan Tamil (SJKT) tidak menghadapi masalah kekurangan guru seperti didakwa. Berdasarkan data Kementerian Pendidikan Malaysia (KPM), kedudukan guru di SJKT sehingga 4 Oktober 2018 menunjukkan lebih sebanyak 158 jawatan berdasarkan kepada perjawatan yang diluluskan tahun semasa iaitu sebanyak 8,835 perjawatan.

Berhubung dengan guru pengganti, KPM melalui Jabatan Pendidikan Negeri dan Pejabat Pendidikan Daerah akan mengisi kekosongan sementara yang berlaku di sekolah dengan melantik guru ganti. Lazimnya, guru ganti terdiri daripada pelajar lulusan Sijil Pelajaran Malaysia (SPM), Sijil Tinggi Persekolahan Malaysia (STPM), Diploma dan Ijazah Sarjana Muda yang tidak memiliki latihan ikhtisas perguruan atau pengalaman dilantik secara kontrak. Khidmat guru ganti tamat apabila guru yang diganti telah habis tempoh bercuti atau berkursus dan kembali bertugas di sekolah.

RJM19

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 18 OKTOBER 2018 (KHAMIS)

SOALAN NO. 20

Minta **MENTERI PENGANGKUTAN** menyatakan :-

- (a)apakah status terkini projek pembinaan lapangan terbang di Seri Iskandar dan bilakah cadangan pembinaan lapangan terbang ini akan dilaksanakan; dan
- (b)adakah terdapat sebarang permasalahan pembinaan lapangan terbang ini.

JAWAPAN:

Yang Dipertua,

1. Kerajaan mengambil maklum akan permohonan cadangan pembangunan Gerbang Cempaka Sari oleh Kerajaan Negeri Perak yang mana turut merangkumi cadangan untuk membina sebuah lapangan terbang baharu di Seri Iskandar bagi menggantikan lapangan terbang sedia ada. Satu kajian telah dilaksanakan oleh pemaju Seri Iskandar yang telah dilantik oleh Kerajaan Negeri. Walau bagaimanapun, kajian tersebut tidak komprehensif. Dalam hubungan ini, Kerajaan Negeri perlu mengemukakan semula cadangan yang lebih lengkap sekiranya Kerajaan Negeri berminat untuk meneruskan permohonan bagi pembinaan sebuah lapangan terbang baharu di Seri Iskandar, Perak.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 18 OKTOBER 2018

SOALAN : 21

**Tuan Nik Nazmi bin Nik Ahmad [Setiawangsa] minta MENTERI
DALAM NEGERI menyatakan:-**

- a) apakah status kemajuan kajian semula terhadap undang-undang SOSMA ; dan
- b) adakah Kerajaan boleh memastikan tiada penderaan sebagaimana banyak didakwa sebelum ini, berlaku ketika kajian semula ini berjalan.

JAWAPAN

Tuan Yang Di Pertua,

Bagi menjawab soalan (a), kerajaan sedang mengkaji semua undang-undang berkaitan keselamatan termasuklah Akta Kesalahan Keselamatan (Langkah-Langkah Khas) 2012 (SOSMA). Dalam hal ini, satu Jawatankuasa Khas yang dianggotai oleh pihak-pihak yang berkaitan seperti Polis Diraja Malaysia (PDRM), Jabatan Peguam Negara (AGC), Badan Peguam Malaysia, Suruhanjaya Hak Asasi Manusia (SUHAKAM) dan badan bukan kerajaan (NGO) telah ditubuhkan untuk menilai dan memperhalus setiap peruntukan dalam undang-undang berkenaan dengan terperinci.

Memandangkan kajian tersebut masih sedang dijalankan, Kerajaan belum memutuskan sama ada undang-undang tersebut perlu dipinda atau dimansuhkan atau undang-undang yang baru perlu diwujudkan.

Bagi menjawab soalan (b), Kementerian Dalam Negeri bersama-sama PDRM sentiasa berusaha untuk menambah baik pelaksanaan sesuatu undang-undang. Sehubungan itu, elemen hak asasi manusia akan turut diambil kira dalam kajian yang sedang dijalankan. Walau bagaimanapun, elemen hak asasi manusia tersebut perlulah diimbangi dengan elemen keselamatan agar pelaksanaan undang-undang negara termasuklah SOSMA menjadi lebih berkesan.

Kerajaan memberi jaminan bahawa pindaan atau pemansuhan terhadap undang-undang berkenaan tidak akan menjejaskan usaha kerajaan dalam memelihara keselamatan negara daripada pelbagai ancaman termasuklah ancaman dari kumpulan pengganas dan jenayah.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' TAKIYUDDIN BIN HASSAN
[KOTA BHARU]**

TARIKH : 18 OKTOBER 2018 (KHAMIS)

SOALAN NO. 22

Minta **MENTERI HAL EHWAL EKONOMI** menyatakan:

- a) berapakah jumlah terkini Rizab Tunai PETRONAS setakat akhir September 2018; dan
- b) apakah status terkini projek-projek yang dilaksanakan oleh PETRONAS terutama RAPID Pengerang, Projek Integrasi Minyak dan Gas Sabah Sarawak (SSIOGP) dan projek Amonia dan Urea Sabah (Samur).

JAWAPAN

Tuan Yang Di-Pertua,

Jumlah rizab tunai kumpulan Petroliaam Nasional Berhad (PETRONAS) seperti yang dilaporkan dalam laporan kewangan interim PETRONAS berakhir 30 Jun 2018 adalah sebanyak RM181.0 billion termasuk dana pelaburan.

Untuk makluman, PETRONAS mengumumkan kedudukan kewangan serta operasinya setiap suku tahunan dan boleh diakses umum melalui laman sesawangnya. Maklumat rizab tunai kumpulan PETRONAS untuk 30 September 2018 dijangka akan diumumkan pada akhir bulan November 2018 ini.

Bagi menjawab soalan seterusnya, status untuk projek-projek utama yang dilaksanakan PETRONAS adalah seperti berikut:

1. **Kompleks Bersepadu Pengerang (Pengerang Integrated Complex) atau PIC termasuk *Refinery and Petrochemical Integrated Development* atau RAPID** – Setakat 31 Ogos 2018, PIC telah mencapai kemajuan sebanyak 94% dan dijangka akan mula beroperasi pada tahun hadapan (2019) seperti yang dijadualkan.
2. **Projek Integrasi Minyak dan Gas Sabah-Sarawak (SSIOPG)** – Projek ini merangkumi pembangunan fasiliti bersepadu seperti pembangunan lapangan minyak dan gas beserta infrastruktur hulu yang berkaitan, Terminal Minyak dan Gas Sabah (SOGT) dan Saluran Paip Gas Sabah-Sarawak (SSGP). SOGT dan SSGP beserta lapangan-lapangan minyak dan gas terlibat telah mula beroperasi sejak Disember 2013.
3. **Projek Ammonia dan Urea Sabah (SAMUR)** – Projek ini telah memulakan operasi komersilnya sejak Mei 2017.

Sekian, terima kasih.
18 Oktober 2018

Kementerian Hal Ehwal Ekonomi

Open

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 18 OKT 2018 (KHAMIS)

SOALAN :

**Puan Nurul Izzah Binti Anwar [Permatang Pauh] minta MENTERI
PEMBANGUNAN WANITA, KELUARGA DAN MASYARAKAT
menyatakan :**

- (a) Statistik jenayah seksual ke atas kanak-kanak dan laporan 'sexual grooming' dari tahun 2013 sehingga September 2018; dan
- (b) Tindakan Kementerian bagi mengekang penularan kes sedemikian di peringkat awal, selain pelaksanaan Akta Kesalahan-Kesalahan Seksual Terhadap Kanak-Kanak 2017 (Akta 792).

JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA
DAN MASYARAKAT

Tuan Yang di-Pertua,

Statistik jenayah seksual ke atas kanak-kanak dari tahun 2013 sehingga Ogos 2018 yang direkodkan oleh Polis Diraja Malaysia (PDRM) adalah sebanyak 6,170 kes. Kes-kes ini merangkumi kesalahan rogol, sumbang mahram, liwat, cabul dan juga kesalahan-kesalahan seksual di bawah Akta Kesalahan-Kesalahan Seksual Terhadap Kanak-Kanak 2017 [Akta 792]. Pecahan bilangan kes bagi enam (6) tahun tersebut adalah seperti berikut:

- a. 2013 – 3,063 kes;
- b. 2014 – 2,726 kes;
- c. 2015 – 2,586 kes;
- d. 2016 – 2,469 kes;
- e. 2017 – 2,377 kes; dan
- f. sehingga Ogos 2018 – 1,324 kes.

Manakala sejak Akta 792 dikuatkuasakan pada 10 Julai 2017, hanya enam (6) kes pengantunan seksual (*sexual grooming*) direkodkan sehingga kini.

Tuan Yang di-Pertua,

Kementerian Pembangunan Wanita, Keluarga dan Masyarakat memandang berat isu jenayah seksual terhadap kanak-kanak. Selaras dengan komitmen negara sebagai Negara Pihak kepada Konvensyen Mengenai Hak Kanak-Kanak (CRC), Kerajaan sentiasa berusaha memperbaiki mekanisme perlindungan kanak-kanak di negara ini.

Kes pengantunan seksual kanak-kanak atau *sexual grooming* didapati sering melibatkan teknologi dan media massa. Selain daripada Akta Kesalahan-kesalahan Seksual Terhadap Kanak-Kanak 2017, **Pelan Tindakan Perlindungan Terhadap Kanak-Kanak Dalam Dunia Siber (PTCOP)** 2015 hingga 2020 telah digubal dengan menekankan empat aspek utama iaitu advokasi, pencegahan, intervensi dan khidmat sokongan. Pelan Tindakan ini merangkumi program dan tindakan bersepadu oleh semua pihak dalam melindungi kanak-kanak dalam dunia siber.

Antara pihak yang terlibat dalam pelaksanaan Pelan Tindakan ini termasuklah Kementerian Komunikasi dan Multimedia, Suruhanjaya Komunikasi dan Multimedia Malaysia, CyberSecurity Malaysia, Kementerian Pendidikan, PDRM, Pertubuhan Bukan Kerajaan seperti Majlis Kebajikan Kanak-Kanak Malaysia, *Protect and Save The Children* dan *Childline Malaysia*. Syarikat swasta seperti Digi, Facebook dan Google turut memainkan peranan yang penting dalam memastikan kanak-kanak di negara ini dapat melayari Internet dengan selamat.

Advokasi dan pendidikan bagi kanak-kanak itu sendiri adalah kunci dalam mencegah berlakunya jenayah seksual terhadap kanak-kanak. Kementerian melalui Jabatan Kebajikan Masyarakat (JKM) melaksanakan **Program Sahabat B.I.J.A.K (Banteras Indeks Jenayah terhadap Kanak-Kanak)** di sekolah untuk menyebarkan maklumat berkaitan aspek keselamatan dan hak kanak-kanak kepada kanak-kanak, ibu bapa, penjaga, guru-guru serta masyarakat. Kementerian melalui Lembaga Penduduk dan Pembangunan Keluarga Negara (LPPKN) juga menjalankan program-program **pendidikan kesihatan sosial dan reproduktif** bagi kanak-kanak dan remaja.

Suruhanjaya Komunikasi dan Multimedia Malaysia (SKMM) turut melaksanakan program advokasi seperti '**Klik Dengan Bijak**' yang mendedahkan teknik mengajar anak-anak tentang komunikasi selamat ketika melayari Internet. SKMM amat aktif dalam program-program advokasi berhubung keselamatan kanak-kanak dalam dunia siber, termasuklah penganjuran **Seminar *Child Online Protection In ASEAN*** pada tahun 2017.

Tuan Yang di-Pertua,

Kementerian juga telah menyampaikan keperluan untuk meminda tafsiran 'pengantunan' (*sexual grooming*) di bawah Akta 792 kepada YB Menteri di Jabatan Perdana Menteri (Undang-Undang) pada 4 Oktober 2018 yang lalu. Keperluan pindaan ini adalah berdasarkan pengalaman Kerajaan dalam mengendalikan isu perkahwinan kanak-kanak yang mana mungkin wujudnya unsur eksploitasi atau pengantunan sebelum suatu perkahwinan itu berlaku. Ini adalah kerana peruntukan sedia ada adalah terhad dan pada asalnya digubal bagi menangani kes-kes pengantunan dalam talian (*online*) dan tidak termasuk pengantunan tidak langsung, contohnya pengantunan dengan niat untuk berkahwin dengan seorang

kanak-kanak dan juga merangkumi pengantunan ibu bapa/penjaga/keluarga kanak-kanak tersebut.

Sehubungan itu, Kementerian berharap kerjasama daripada jabatan yang berkaitan dalam cadangan pindaan undang-undang ini dapat diberikan sebaiknya. Dalam pada itu, dengan adanya kesedaran di kalangan kanak-kanak, ibu bapa, guru-guru, dan masyarakat secara umumnya, diharapkan kes-kes eksploitasi seksual kanak-kanak akan dapat dikekang.

PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL PERTAMA

PERTANYAAN : LISAN
DARIPADA : DATO' SRI MUSTAPA BIN MOHAMED
KAWASAN : JELI
TARIKH : 18 OKTOBER 2018

SOALAN

Dato' Sri Mustapa bin Mohamed [Jeli] minta MENTERI PERDAGANGAN ANTARABANGSA DAN INDUSTRI menyatakan strategi Kerajaan untuk menangani ketidaktentuan perdagangan akibat peperangan perdagangan antara Amerika Syarikat dan China. Berapakah syarikat yang sudah menyatakan minat untuk melabur di Malaysia berikutan ketidaktentuan tersebut dan apakah sektor-sektor utama yang dilihat berpotensi untuk mengambil peluang dari ketidaktentuan ini.

JAWAPAN:

Tuan Yang di-Pertua,

Untuk makluman dewan yang mulia ini, lanjutan daripada peperangan perdagangan di antara Amerika Syarikat dan China yang memberi kesan kepada ekonomi global, satu Pasukan Petugas Khas Konflik Perdagangan US-China atau dengan izin, *US-China Taskforce on Trade Conflict* telah ditubuhkan oleh Kerajaan. Usaha ini adalah bagi memantau dan merangka strategi menangani kesan ketidaktentuan perdagangan di antara Amerika Syarikat dan China.

Pasukan petugas ini bekerjasama dengan agensi-agensi berkaitan termasuk Bank Negara Malaysia, Suruhanjaya Sekuriti dan Khazanah Nasional dan dengan izin, *research houses*, bagi memahami dengan lebih mendalam kesan langsung dan tidak langsung akibat daripada perang perdagangan ini.

Bagi mendapatkan gambaran yang menyeluruh dan tepat, pasukan petugas tersebut kini sedang dalam proses menjalankan soal selidik bersama pihak industri bagi mendapatkan maklum balas langsung dalam usaha merumuskan strategi yang lebih berkesan bagi menangani konflik ini. Ini termasuklah strategi seperti meningkatkan eksport melalui pemerkasaan inisiatif eksport sedia ada dan penerokaan pasaran dan produk eksport baharu.

Kebimbangan umum utama berikutan perang perdagangan di antara dua kuasa besar dunia ini adalah ketidaktentuan pasaran. Dijangkakan konflik perdagangan ini boleh membawa kesan buruk ke atas ekonomi dalam jangka masa panjang. Pertubuhan Perdagangan Dunia atau WTO misalnya, telah mengurangkan unjuran pertumbuhan perdagangan dunia dari 3.9 peratus ke 3.7 pada tahun 2019. Manakala, Tabung Kewangan Antarabangsa (IMF) pula meramalkan pengurangan pertumbuhan Keluaran Dalam Negara Kasar (KDNK) dunia dari 4.7 peratus ke 4.6 peratus.

Tuan Yang di-Pertua,

Setakat ini, berdasarkan maklum balas yang diterima oleh Pasukan Petugas Khas, kesan konflik ini ke atas Malaysia adalah terhad. Malaysia dijangka dapat meraih manfaat melalui peningkatan jumlah pelaburan asing dari Amerika Syarikat dan China jika perang perdagangan ini berlarutan.

Dalam tempoh Januari hingga Ogos 2018, sebanyak 38 projek yang melibatkan penyertaan pelabur dari Amerika Syarikat dan China telah menyatakan hasrat untuk melabur di Malaysia dalam sektor perkilangan.

Daripada jumlah projek tersebut, sebanyak 16 projek adalah dari Amerika Syarikat dengan nilai pelaburan berjumlah RM4.3 bilion manakala 22 projek lagi daripada China dengan nilai pelaburan sebanyak RM1.5 bilion. Projek-projek ini dijangka dapat mewujudkan 13,750 peluang pekerjaan.

Sebanyak 12 projek iaitu 31.5% daripada jumlah projek tersebut berhasrat untuk melabur dalam industri elektrik dan elektronik (E&E), tujuh projek (18.4%) dalam industri kimia dan produk kimia serta 19 projek dalam lain-lain industri.

Tuan Yang di-Pertua,

Industri E&E merupakan sektor utama yang dilihat akan menerima impak positif daripada segi peningkatan pelaburan langsung asing dan penyumberan luar atau dengan izin, *outsourcing* kepada syarikat domestik serta membuka peluang kepada industri tempatan untuk mengeksport bagi memenuhi keperluan rantai bekalan global.

Syarikat-syarikat dari Amerika Syarikat dan China boleh menjadikan Malaysia sebagai pusat pengeluaran serantau atau dengan izin, *regional production hub* alternatif untuk beberapa barangan bagi mengelakkan tarif tambahan yang dikenakan oleh kedua-dua negara.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN CHARLES ANTHONY SANTIAGO
[KLANG]**

TARIKH : 18 OKTOBER 2018 (KHAMIS)

SOALAN NO. 25

Minta **MENTERI HAL EHWAL EKONOMI** menyatakan sama ada Kerajaan berminat untuk menubuhkan Suruhanjaya Ketidaksamarataan (*Inequality Commission*), seperti di negara Korea Selatan sebagai satu langkah untuk mengurangkan jurang pendapatan di antara orang kaya dan miskin.

JAWAPAN

Yang di-Pertua,

Untuk makluman Ahli Yang Berhormat, syor agar Kerajaan menubuhkan Suruhanjaya Ketidaksamarataan (*Inequality Commission*) seperti di negara Korea Selatan untuk mengurangkan jurang pendapatan di antara orang kaya dan miskin pada asasnya merupakan satu cadangan yang baik. Walau bagaimanapun, cadangan ini perlu dikaji secara mendalam terlebih dahulu sekiranya terdapat keperluan untuk menubuhkan suruhanjaya ini di Malaysia.

Dalam pada itu, Kerajaan komited untuk terus merapatkan jurang pendapatan supaya setiap rakyat mendapat manfaat daripada pembangunan negara secara inklusif, khususnya dari segi peningkatan pendapatan dan kuasa beli serta kualiti hidup. Antara inisiatif utama Kerajaan dalam Rancangan Malaysia Kesebelas (RMKe-11) adalah seperti berikut:

- i. memperluaskan program pendidikan dan latihan kepada rakyat dengan memberi fokus kepada pembangunan kapasiti dan kapabiliti dalam kalangan isi rumah B40, termasuk masyarakat Orang Asli, Anak Negeri Sabah dan Bumiputera Sarawak. Ini meliputi penyediaan kemudahan pembiayaan pendidikan dan latihan bertujuan untuk meningkatkan tahap kemahiran serta peluang mereka bagi memperolehi pekerjaan berpendapatan lebih tinggi;
- ii. memperluaskan penglibatan dalam bidang perniagaan dan keusahawanan, termasuk secara atas talian (*online*). Ini dilaksanakan dengan meningkatkan akses dan peluang kepada bantuan pembiayaan kredit mikro, khidmat nasihat dan latihan keusahawan serta pembinaan gerai niaga dan program sokongan perniagaan mikro serta perniagaan kecil dan sederhana;
- iii. meningkatkan produktiviti dan pendapatan para petani, pekebun kecil dan nelayan melalui aplikasi teknologi moden, amalan pertanian terbaik (*good agricultural practices*) dan aktiviti ekonomi tambahan;

SOALAN NO : 25

- iv. rasionalisasi jaringan keselamatan sosial (*social safety net*) yang meliputi bantuan kewangan secara langsung kepada golongan yang memerlukan seperti warga emas dan orang kurang upaya (OKU); dan
- v. memperluas akses kepada kemudahan asas seperti infrastruktur dan pengangkutan, utiliti dan ameniti sosial di kawasan luar bandar bagi memperkukuh keterhubungan, merancakkan aktiviti ekonomi dan meningkatkan kesejahteraan rakyat.

Sekian, terima kasih.

18 Oktober 2018

Kementerian Hal Ehwal Ekonomi

**PEMBERITAHU PERTANYAAN
DEWAN RAKYAT, MALAYSIA**

PERTANYAAN : JAWAB LISAN

**DARIPADA : DATUK WIRA HAJAH MAS ERMIEYATI
BINTI SAMSUDIN [MASJID TANAH]**

RUJUKAN : [PR-1412-L02762]

TARIKH : 18 OKTOBER 2018 (KHAMIS)

SOALAN :

Datuk Wira Hajah Mas Ermieyati binti Samsudin [Masjid Tanah] minta **MENTERI WILAYAH** menyatakan jumlah keluasan tanah lapang yang telah dikenal pasti untuk dijadikan taman rekreasi atau kawasan hijau demi kesejahteraan penduduk bandar raya dan sebagai pusat tarikan pelancong.

JAWAPAN

Tuan Yang Di-Pertua,

Untuk makluman Yang Berhormat Masjid Tanah, Pelan Bandar Raya Kuala Lumpur 2020 (PBRKL2020) telah mengezonkan 2,260.16 hektar untuk kegunaan tanah lapang yang terdiri daripada 1,808.64 hektar tanah lapang awam dan 451.52 hektar tanah lapang swasta. Dari jumlah tersebut, sebanyak 1,758.05 hektar (78%) tanah lapang adalah merupakan tanah lapang sedia ada.

Tanah Lapang Awam merangkumi taman-taman rekreasi bagi tujuan awam dan dibahagikan kepada beberapa kategori iaitu Taman Bandar, Taman Daerah, Taman Kejiranan, Taman Tempatan, Kawasan Permainan Tempatan, Kemudahan Sukan dan Kawasan Hijau Linear. Manakala, Tanah Lapang Swasta pula merangkumi kawasan lapang, taman, taman permainan, tapak rekreasi, gelanggang sukan dan padang golf milik persendirian yang mana orang awam tidak mempunyai hak atau akses terhad kecuali dengan kebenaran.

Di antara taman-taman sedia ada di tanah lapang awam yang menjadi kemudahan rekreasi kepada warga kota adalah seperti:

- i. Taman Botani Perdana (Parlimen Segambut);
- ii. Taman Rimba Kiara (Parlimen Segambut);
- iii. Taman Dusun Bandar (Parlimen Segambut);
- iv. Taman Tasik Manjalara (Parlimen Segambut);
- v. Taman Tasik Titiwangsa (Parlimen Titiwangsa);
- vi. Taman Tasik Datuk Keramat (Parlimen Setiawangsa);
- vii. Taman Kejiranan Air Panas Setapak (Parlimen Setiawangsa);
- viii. Taman Medan Idaman (Parlimen Wangsa Maju);
- ix. Taman Tasik Danau Kota (Parlimen Wangsa Maju);
- x. Taman Metropolitan Kepong (Parlimen Kepong);

- xi. Taman Metropolitan Batu (Parlimen Batu);
- xii. Taman Tasik Permaisuri (Parlimen Bandar Tun Razak);
- xiii. Taman Bukit Jalil (Parlimen Bandar Tun Razak);
- xiv. Taman Alam Damai (Parlimen Bandar Tun Razak);
- xv. Taman Tasik Ampang Hilir (Parlimen Bukit Bintang);
- xvi. Taman Rekreasi Pudu Ulu (Parlimen Cheras); dan
- xvii. Taman Rimba Bukit Kerinchi (Parlimen Lembah Pantai).

Pihak DBKL telah mengenalpasti 5 tapak tanah lapang lagi yang bersesuaian untuk dijadikan taman rekreasi untuk dibangunkan di bawah peruntukan tahun 2018/2019 iaitu:

- i. Taman Etno Botani (1.09 hektar);
- ii. Jalan Landak, Pudu (0.5 hektar);
- iii. Jalan Madrasah, Wangsa Maju (1.5 hektar);
- iv. Lorong Ikhlas, Bandar Tun Razak (0.9 hektar); dan
- v. Jalan Permaisuri 3, Bandar Sri Permaisuri (2.8 hektar).

Untuk makluman Yang Berhormat, perancangan dan pembangunan tanah lapang sebagai kawasan rekreasi dilaksanakan oleh pihak DBKL pada setiap tahun. Ia adalah bertujuan sebagai lokasi dan menjadi kemudahan kepada warga kota untuk beriadah bagi mewujudkan masyarakat yang sihat serta meningkatkan kualiti hidup di bandar ke arah untuk menjadikan Kuala Lumpur sebagai bandar raya berdaya huni.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)**

PERTANYAAN : LISAN

TARIKH : 18 OKTOBER 2018 (KHAMIS)

**DARIPADA : TUAN AHMAD MARZUK BIN SHAARY
[PENGKALAN CHEPA]**

SOALAN : 27

Tuan Ahmad Marzuk bin Shaary [Pengkalan Chepa] minta **PERDANA MENTERI** menyatakan apakah bukti jelas beban rakyat berjaya dikurangkan sebagaimana janji HARAPAN dalam Pilihan Raya Umum ke 14 lalu. Apakah Kerajaan mengakui bahawa rakyat tidak begitu merasai perubahan positif dalam bebanan hidup seharian mereka.

**JAWAPAN: YB DATUK LIEW VUI KEONG
MENTERI DI JABATAN PERDANA MENTERI**

Tuan Yang di-Pertua,

1. Usaha Kerajaan Persekutuan untuk mengurangkan beban rakyat telah dimulakan dengan langkah menstabilkan harga petrol RON 95 dan Diesel mulai 16 Mei 2018 serta mengurangkan kadar GST kepada 0% mulai 1 Jun 2018. Berdasarkan maklumat dari Jabatan Statistik Malaysia, Indeks Harga Pengguna (IHP) pada Jun 2018 telah menurun sebanyak 1.2% berbanding pada Mei 2018. Sebagai perbandingan, IHP pada Mei 2018 meningkat sebanyak 0.2% berbanding April 2018. Di

samping itu, inflasi Indeks Teras pada bulan Jun 2018 direkodkan sebanyak 0.1% berbanding 1.5% pada bulan Mei 2018.

2. Ini membuktikan bahawa langkah menstabilkan harga petrol RON 95 dan Diesel serta memansuhkan cukai GST telah berjaya mengurangkan beban yang ditanggung oleh rakyat melalui pengurangan harga barangan dan perkhidmatan. Dalam pada itu, usaha-usaha lain yang sedang dilaksanakan dijangka akan terus membantu dalam mengurangkan beban rakyat antaranya memperkenalkan Standard Mandatori Mengenai Harga Capaian untuk jalur lebar talian tetap. Inisiatif ini akan memberikan pengurangan sehingga 43% dari kos langganan bulanan yang perlu ditanggung oleh rakyat .

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN MUSLIMIN BIN YAHAYA
[SUNGAI BESAR]**

TARIKH : 18 OKTOBER 2018

SOALAN : 28

Tuan Muslimin bin Yahaya [Sungai Besar] minta MENTERI DALAM NEGERI menyatakan berkaitan di setiap serbuan dan tangkapan pusat premis judi ekor dan mesin slot yang biasanya setelah diserbu dan tangkapan dibuat mengapakah selang beberapa waktu, minggu dan bulan pusat tersebut kembali beroperasi. Apakah Kementerian mempunyai maklumat ini dan bagaimana cara untuk membendung dari perkara ini terus berlaku.

JAWAPAN

Tuan Yang Di Pertua,

Kementerian Dalam Negeri (KDN) melalui Polis Diraja Malaysia (PDRM) sentiasa memantau dan mengambil tindakan secara berterusan untuk menangani kegiatan perjudian haram yang di dalangi oleh sindiket perjudian di dalam negara. Pada 20 Julai 2018, YDH Ketua Polis Negara telah mengarahkan supaya di adakan talian khas di setiap bilik gerakan di seluruh negara bagi memudahkan orang awam untuk menyalurkan maklumat yang beroperasi selama 24 jam sehari. Ketua Polis Negeri dan Ketua Polis Daerah di arahkan untuk meneliti setiap aduan yang diterima dan membuat serbuan terhadap premis yang disyaki menjalankan kegiatan perjudian haram ini.

Pihak PDRM menyedari tentang kewujudan semula premis perjudian walaupun telah di serbu beberapa kali oleh pihak berkuasa. Keadaan ini berlaku di disebabkan oleh faktor-faktor berikut:-

- i) Aktiviti perjudian memberikan pendapatan yang lumayan kepada sindiket dengan membuat pelaburan yang kecil. Sindiket hanya perlu menyewa sebuah premis dan menyediakan komputer yang berharga murah dan talian internet untuk mula beroperasi. Dalam siasatan yang dijalankan, pihak sindiket berupaya mengaut keuntungan ratusan ribu sehingga jutaan ringgit dalam sebulan bergantung kepada jumlah mesin yang beroperasi, turut didedahkan bahawa sindiket akan memperolehi keuntungan antara RM 500 ke RM 1000 bagi setiap mesin dalam sehari.
- ii) Permintaan terhadap permainan judi sentiasa ada dan sindiket tidak perlu untuk mencari pelanggan, malah pelanggan sendiri akan mencari premis berkenaan. Lebih menarik minat kaki judi, premis berkenaan turut menyediakan makan atau minum secara percuma dan kemudahan kredit turut disediakan oleh sindiket.

- iii) Kesukaran untuk membuat pendakwaan memandangkan kebanyakan “ Server “ bagi aktiviti perjudian ini berada di luar negara. Tindakan terhadap pemilik asal premis juga tidak dapat diambil memandangkan tiada keterangan yang diperoleh untuk membuktikan elemen dalam pengetahuan nya bahawa premis tersebut telah digunakan untuk tujuan pengajuran perjudian. Alasan yang sering digunakan adalah premis tersebut telah di sewa dan tuan punya premis tidak mengetahui penyewa telah menjadikan nya sebagai tempat untuk berjudi.

PDRM sememangnya berusaha keras untuk membasmi kegiatan perjudian ini sehingga dapat di tangani sepenuhnya. Namun demikian usaha dan tindakan yang diambil oleh Polis tidak akan berjaya sepenuhnya tanpa penglibatan daripada orang ramai untuk menghindari aktiviti yang tidak sihat ini serta menghakis perasaan untuk mendapatkan keuntungan dengan cara mudah tanpa berusaha yang akhir nya membawa kemudaratan kepada mereka sendiri.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

**PERTANYAAN : LISAN
DARIPADA : DATO' HENRY SUM AGONG
[LAWAS]
TARIKH : 18 OKTOBER 2018 (KHAMIS)**

SOALAN NO. 29

Minta **MENTERI KESIHATAN** menyatakan status terkini pelaksanaan Hospital Lawas dan Klinik Long Sukang.

JAWAPAN

Yang di-Pertua,

Kementerian Kesihatan Malaysia (KKM) amat prihatin dengan situasi dan permasalahan yang berlaku kepada penduduk di sekitar Daerah Lawas yang memerlukan hospital gantian bagi menggantikan hospital sedia ada yang berada dalam keadaan uzur dan tidak dapat menampung keperluan semasa penduduk setempat.

Selaras dengan surat Kementerian Kewangan Malaysia bertarikh 29 Jun 2018 iaitu Penambahbaikan Tadbir Urus dan Pelaksanaan Perolehan Kerajaan, semua pelaksanaan perolehan hendaklah dibatalkan dan ditender semula secara Tender Terbuka atau Tender Terbuka (Pra-Kelayakan).

Justeru, projek ini sedang dalam proses tender semula di peringkat Jabatan Kerja Raya Malaysia (JKRM) yang akan dilaksanakan secara tender terbuka (pra kelayakan). Projek ini dijangka mengambil masa 36 bulan untuk dibina.

Berhubung Klinik Long Sukang, KKM akan mempertimbangkan agar permohonan projek ini diangkat kepada Unit Perancang Ekonomi dalam Rolling Plan 5, Rancangan Malaysia ke-11.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. SANTHARA
[SEGAMAT]**

TARIKH : 18 OKTOBER 2018 (KHAMIS)

SOALAN NO. 30

Minta **MENTERI PERUMAHAN DAN KERAJAAN TEMPATAN** menyatakan apakah rancangan Kementerian untuk membina 10 ribu unit **rumah kediaman bagi warga Segamat khususnya DUN Buluh Kasap dan DUN Jementah**. Nyatakan tempoh pelaksanaan serta status pembinaan dan mekanisme permohonannya.

JAWAPAN

Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) sangat peka terhadap isu penyediaan rumah kediaman kepada rakyat termasuklah kepada warga Segamat. Justeru antara perancangan KPKT dalam membangunkan perumahan di seluruh negara ialah melalui pelaksanaan Program Perumahan Rakyat (PPR) yang melibatkan kerjasama antara Kerajaan Persekutuan dengan Kerajaan Negeri.

2. KPKT sangat mengalu-alukan syor dan cadangan tapak yang bersesuaian dari Kerajaan Negeri untuk melaksanakan projek PPR khususnya di Negeri Johor mengikut mekanisme permohonan projek yang telah ditetapkan oleh pihak KPKT. Pihak KPKT juga akan meneliti kesesuaian tapak yang dicadangkan dan akan memberikan keutamaan kepada lokasi-lokasi yang mempunyai bilangan setinggan serta permohonan rumah bagi golongan B40 yang tinggi.
3. Untuk makluman Ahli Yang Berhormat juga, berkenaan tapak yang dicadangkan oleh pihak Kerajaan Negeri, pihak KPKT akan menilai kesesuaian tapak berkenaan berdasarkan garis panduan Unit Perancang Ekonomi (EPU), Jabatan Perdana Menteri (JPM). Tapak milik Kerajaan Negeri adalah diberikan keutamaan untuk KPKT melaksanakan Program Perumahan Rakyat (PPR) ini secara tender terbuka mengikut dasar yang telah ditetapkan oleh kerajaan sekarang. Namun begitu, pelaksanaan pembangunan PPR ini juga tertakluk kepada peruntukan kewangan yang disediakan oleh Kerajaan Persekutuan.
4. Untuk makluman Ahli Yang Berhormat juga, tempoh pelaksanaan sesuatu projek pembinaan PPR adalah antara 24 hingga 36 bulan tertakluk kepada jenis pemajuan yang akan dilaksanakan. Sehingga kini, KPKT telah menyiapkan 1 projek PPR yang melibatkan sebanyak 102 unit rumah iaitu PPR Batu Anam dalam daerah Segamat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 18 OKTOBER 2018 (KHAMIS)

SOALAN NO. 31

Minta **MENTERI PERUMAHAN DAN KERAJAAN TEMPATAN** menyatakan apakah pendirian Malaysia berhubung laporan bahawa **tanah di Malaysia kini menjadi tempat pembuangan sampah terutamanya plastik bagi negara-negara seperti New Zealand, Australia dan United Kingdom** serta apakah tindakan jangka pendek dan panjang untuk menangani masalah ini.

JAWAPAN

Yang di-Pertua,

1. Untuk makluman Yang Berhormat, dasar mengenai pengimportan sisa pepejal ke negara ini adalah amat jelas. Kerajaan tidak akan membenarkan negara ini dijadikan tempat pembuangan sisa pepejal ataupun dumpsite. Jenis sisa plastik yang dibenarkan untuk diimport adalah tertakluk di bawah Perintah Duti Kastam 2012 iaitu sisa plastik dengan kod 3915. Syarikat-syarikat yang mengimport sisa plastik ini dikawal melalui permit import (approved permit - AP) daripada Kementerian Perumahan dan Kerajaan Tempatan (KPKT).

2. Untuk makluman Ahli Yang Berhormat juga, pemprosesan plastik merupakan industri yang mampu menyumbang dan memainkan peranan yang penting dalam memacu ekonomi negara kerana 49% produk plastik yang dihasilkan di dalam negara dieksport sebagai bahan mentah kepada produk lain. Berdasarkan rekod KPKT, jumlah penggunaan resin meningkat kepada 2.35 juta tan dengan nilai dagangan sebanyak RM29.80 bilion setahun pada tahun 2017 berbanding 2.26 juta tan dengan nilai dagangan sebanyak RM27.32 bilion setahun pada tahun 2016. Dalam hal ini, Kementerian merancang akan memperketatkan syarat-syarat pengeluaran AP Sisa Plastik dan mengambil tindakan untuk mengurangkan kebergantungan kilang kepada bekalan sisa import. Langkah ini juga dapat memastikan industri plastik tempatan tidak terjejas di samping akan merangsang aktiviti kitar semula sisa plastik tempatan.
3. Bagi menangani isu berkaitan aktiviti-aktiviti pengimportan sisa plastik dari luar negara secara haram, Kementerian telah melaksanakan langkah-langkah penguatkuasaan jangka pendek seperti berikut:
 - (i) menghentikan pemberian AP sisa plastik kepada semua pengimport berkuat kuasa pada 23 Julai 2018 untuk tempoh 3 bulan. Walaupun penguatkuasaan mengenai pengoperasian kilang haram dan pematuhan peraturan alam sekeliling adalah di bawah bidang kuasa Pihak Berkuasa Tempatan (PBT) dan Jabatan Alam Sekitar, KPKT bertanggungjawab untuk memeriksa pematuhan dan mengemas kini data semua operator kilang sisa plastik yang berdaftar dengan KPKT;
 - (ii) mulai bulan Julai 2018, KPKT melalui Jabatan Pengurusan Sisa Pepejal Negara (JPSPN) telah pun melaksanakan pemberian AP berdasarkan kapasiti sebenar mesin pemprosesan sisa plastik di kilang milik syarikat yang mana sebelum ini kapasiti import ditentukan oleh pihak JAS. Langkah ini bertujuan mengelakkan AP Sisa Plastik yang dikeluarkan oleh KPKT disalah guna seperti penjualan AP kepada pihak ketiga yang tidak berdaftar; dan

- (iii) KPKT juga telah menubuhkan satu pasukan petugas (taskforce) AP Sisa Plastik yang dipengerusikan oleh Ketua Pengarah JPSPN bagi mengkaji semula prosedur dan polisi semasa pengimportan sisa plastik Kod Tarif 3915. Keanggotaan taskforce tersebut terdiri daripada agensi-agensi seperti Jabatan Alam Sekitar (JAS), Jabatan Kastam Diraja Malaysia, Kementerian Perdagangan Antarabangsa dan Industri (MITI), Lembaga Pembangunan Pelaburan Malaysia (MIDA), Jabatan Keselamatan dan Kesihatan Pekerjaan (JKKP) dan Perbadanan Pengurusan Sisa Pepejal dan Pembersihan Awam (SWCorp).
4. Selain itu, KPKT juga sedang merangka tindakan jangka masa panjang bagi penetapan hala tuju pengimportan sisa plastik (H.S. Code 3915) di Malaysia seperti berikut:
- (i) penetapan kuota kebangsaan pengimportan sisa plastik supaya jumlah sisa plastik yang masuk tidak melebihi kuota yang ditetapkan;
 - (ii) penetapan ratio bagi syarikat pengimport sisa plastik dengan menggalakkan penggunaan sisa plastik tempatan;
 - (iii) menghadkan pemberian AP kepada syarikat sedia ada yang memenuhi kriteria yang ditetapkan oleh Kementerian;
 - (iv) pemberian AP secara bersyarat antaranya menghendaki pemohon menyediakan bank guarantee; dan
 - (v) penggubalan peraturan khusus bagi mengawal selia sisa plastik import.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. RONALD KIANDEE
[BELURAN]**

TARIKH : 18 OKTOBER 2018 (KHAMIS)

SOALAN NO. 32

Minta **MENTERI HAL EHWAL EKONOMI** menyatakan apakah dasar-dasar baharu Kementerian di dalam agenda memperkasakan ekonomi Bumiputera khusus kepada golongan B40 dan M40.

JAWAPAN

Yang di-Pertua,

Untuk makluman Ahli Yang Berhormat,

Kerajaan Malaysia yang baru komited untuk memberi nafas baru kepada pelaksanaan agenda pembangunan Bumiputera yang sudah semestinya turut akan melibatkan kumpulan isi rumah berpendapatan 40 peratus terendah (B40) dan kumpulan isi rumah berpendapatan 40 peratus pertengahan (M40). Dalam hal ini, pelbagai dasar baharu dan sedia ada sedang dikaji dan akan ditambahbaik berpandukan kepada keperluan semasa dan cabaran ekonomi dunia serta mengambil kira aku janji di bawah Manifesto Pakatan Harapan. Ini bagi memastikan pembangunan ekonomi Bumiputera yang lebih mampan dan lestari dapat diwujudkan sekaligus meningkat keupayaan skala ekonomi Bumiputera untuk lebih berdaya saing.

Sehubungan itu, pelaksanaan dasar baharu dan sedia ada yang ditambahbaik ini akan diterjemahkan di dalam strategi, inisiatif dan hala tuju di bawah Kajian Separuh Penggal Rancangan Malaysia Kesebelas (KSP RMKe-11) yang telah dirangka oleh Kerajaan. Ringkasnya, antara strategi yang dirangka adalah meliputi pemerksaan pendidikan dan modal insan terutama dalam kalangan pelajar daripada keluarga B40. Selain itu, strategi ini turut merangkumi memperkukuhkan keberkesanan institusi dan program, meningkatkan pemilikan kekayaan, meningkatkan kawalan efektif dan kemampanan dalam pemilikan korporat dan membina Komuniti Ekonomi Bumiputera (BEC) yang berdaya tahan dan mampan dalam kalangan Bumiputera secara keseluruhan berdasarkan keperluan dan merit.

Pembentangan lengkap berhubung halatuju baharu ini akan dibentangkan pada hari ini, 18h Oktober 2018, yang turut mengambil kira pendekatan secara inklusif termasuk untuk Bumiputera dalam kalangan kumpulan pendapatan isi rumah B40 dan M40.

Sekian, terima kasih.

18 Oktober 2018

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' SRI IKMAL HISHAM BIN ABDUL AZIZ
[TANAH MERAH]
TARIKH : 18 OKTOBER 2018 (KHAMIS)

SOALAN NO. 33

Minta **MENTERI KESIHATAN** menyatakan apakah status terkini projek menaikkan taraf Hospital Tanah Merah.

JAWAPAN

Yang di-Pertua,

Projek menaiktaraf Hospital Tanah Merah iaitu projek pembinaan sebuah bangunan tambahan telah mula dilaksanakan di tapak. Tarikh mula projek ini adalah pada 3 Mei 2018 dan bakal disiapkan pada 27 Oktober 2021.

Pihak Jabatan Kerja Raya selaku Agensi Pelaksana bagi projek ini memaklumkan sehingga bulan September 2018, kemajuan fizikal projek adalah 7 peratus sebenar berbanding 6 peratus jadual iaitu mendahului jadual sebanyak 1 peratus.

Pihak Kontraktor yang dilantik telah berjaya menyiapkan kerja-kerja pembersihan kawasan (site clearing), pembinaan Pejabat Tapak dan pembinaan pagar kawasan tapak (hoarding). Selain itu juga, pihak Kontraktor sedang giat melakukan persediaan untuk memulakan kerja-kerja tanah di kawasan utama pembinaan bangunan tambahan berkenaan.

Untuk makluman, kesemua projek-projek dengan kos melebihi RM50 Juta yang belum mencapai kemajuan fizikal sebanyak 15 peratus sedang dikaji semula oleh Kementerian Kewangan Malaysia selaras dengan kemampuan kewangan Kerajaan. Salah satu projek yang terlibat adalah projek pembinaan bangunan tambahan Hospital Tanah Merah. Kementerian Kesihatan Malaysia masih menunggu keputusan rasmi oleh Kementerian Kewangan Malaysia berhubung pelaksanaan projek ini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WONG KAH WOH
[IPOH TIMUR]
TARIKH : 18 OKTOBER 2018 (KHAMIS)

SOALAN NO. 34

Y.B. TUAN WONG KAH WOH [IPOH TIMUR] minta **MENTERI KEWANGAN** menyatakan rancangan dan pendekatan jangka masa panjang dan jangka masa pendek untuk pembangunan ekonomi negara setelah mengambil kira komitmen yang terpaksa ditanggung oleh Kerajaan baharu dalam pemulangan wang bayaran balik GST dan Cukai Pendapatan tertunggak dan juga isu hutang negara yang mendadak.

JAWAPAN

Tuan Yang di-Pertua,

1. Dalam tempoh separuh pertama 2018, ekonomi negara mencatat pertumbuhan memberangsangkan sebanyak 4.9 peratus dipacu oleh permintaan domestik terutamanya perbelanjaan swasta serta prestasi perdagangan luar yang baik selaras dengan aktiviti perdagangan global yang meningkat. Dari sudut penawaran, kesemua sektor ekonomi mencatat pertumbuhan positif diterajui oleh sektor perkhidmatan dan pembuatan yang meningkat 6.5 peratus dan 5.1 peratus. Eksport kasar negara pula kekal kukuh mencatat pertumbuhan sebanyak 7 peratus manakala import kasar meningkat 3.4 peratus dalam tempoh yang sama.
2. Ekonomi negara terus beroperasi dalam keadaan guna tenaga penuh dengan kadar pengangguran pada 3.4 peratus serta inflasi yang lebih rendah pada 1.6 peratus dalam tempoh enam bulan pertama 2018. Sistem kewangan yang lebih berdaya tahan dan maju berserta paras rizab antarabangsa yang kekal tinggi memperkukuh keupayaan ekonomi negara untuk menghadapi kejutan luar serta memastikan bahawa pengantaraan kewangan terus berfungsi tanpa gangguan.
3. Mengambil kira asas-asas ekonomi yang kukuh serta unjuran pertumbuhan ekonomi dan perdagangan dunia yang mengukuh, pertumbuhan ekonomi negara dijangka kekal mapan dalam jangka masa terdekat. Jangkaan ini adalah selari dengan unjuran pertumbuhan ekonomi negara oleh Tabung Kewangan Antarabangsa (IMF) dan Bank Dunia di antara 4.7 peratus hingga 4.9 peratus bagi 2018 dan 2019. Pertumbuhan ini terus disokong oleh permintaan domestik yang menggalakkan dan diperteguh oleh sektor luaran yang baik.
4. Dalam jangka masa terdekat, dengan mengambil kira ekonomi negara yang dijangka kekal kukuh, rancangan dan pendekatan jangka masa panjang dan jangka masa pendek pembangunan ekonomi negara akan diteruskan.

Namun demikian, pendekatan lebih berhemat perlu dilaksanakan selari dengan langkah penjimatan perbelanjaan bagi memastikan konsolidasi fiskal dapat diteruskan.

5. Kerajaan sedang melaksanakan pelbagai strategi bagi memastikan pertumbuhan ekonomi yang mampan dan inklusif serta memelihara kesejahteraan rakyat. Antara strategi utama adalah mengurangkan hutang negara melalui kepatuhan yang tegas terhadap disiplin fiskal serta pengurusan hutang yang baik. Kerajaan berpegang kepada prinsip cekap, akauntabiliti dan ketelusan dalam pengurusan kewangan negara bagi mengimbangi hasil Kerajaan dan komitmen perbelanjaan dalam jangka panjang termasuklah menyemak semula projek-projek yang diberikan secara rundingan terus atau melalui tender terhad; merunding semula pelaksanaan serta struktur kos projek mega seperti *High Speed Rail (HSR)*, *East Coast Rail Link (ECRL)*, *Mass Rapid Transit 3 (MRT3)* dan *Light Rail Transit 3 (LRT3)*; serta melaksanakan langkah penjimatan perbelanjaan operasi.

6. Pada masa sama, Kerajaan akan terus menyokong aktiviti pelaburan serta memudah cara proses perniagaan dan perdagangan melalui Revolusi Perindustrian 4.0 dan *Productivity Blueprint* bagi memastikan kecekapan, produktiviti dan pulangan pelaburan. Di samping itu, Kerajaan akan mengurangkan penyertaan langsung dalam pemilikan syarikat bagi meningkatkan daya saing dan mengoptimumkan potensi sektor swasta.

7. Kerajaan juga sentiasa prihatin terhadap keperluan rakyat bagi mengimbangi pertumbuhan ekonomi dan kesejahteraan hidup. Usaha bagi mewujudkan lebih banyak pekerjaan berkualiti untuk meningkatkan pendapatan rakyat terus dilaksanakan. Di samping itu, inisiatif mengurangkan kos sara hidup dan mendorong pertumbuhan upah yang lebih pantas turut dipergiat melalui pengenalan sistem percukaian mesra rakyat dan mesra usahawan. Pada masa sama, kualiti pendidikan dan perkhidmatan kesihatan sentiasa ditambah baik di samping menambah program perumahan mampu milik bagi menyediakan suasana kehidupan yang lebih harmoni.

Tuan Yang Di-Pertua,

8. Kerajaan sentiasa memastikan langkah berhemat yang diambil tidak akan menjejaskan kesejahteraan rakyat dan keyakinan pelabur terhadap Malaysia serta kadar pertumbuhan negara kekal mampan. Bajet 2019 yang bakal dibentangkan pada 2 November 2018 di dalam Dewan yang mulia ini akan menyatakan secara lebih terperinci langkah Kerajaan bagi memastikan pembangunan berterusan ekonomi negara.

SULIT

SOALAN NO: 35

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATUK SERI DR. ADHAM BIN BABA
[TENGGAH]**

TARIKH : 18 OKTOBER 2018

SOALAN : 35

Datuk Seri Dr. Adham bin Baba [Tenggara] minta **PERDANA MENTERI** menyatakan berapakah kos keseluruhan delegasi Kerajaan dalam lawatan ke negara China dan apakah hasil yang dibawa pulang untuk dinikmati oleh rakyat Malaysia.

SULIT

SULIT

JAWAPAN: **YB DATUK LIEW VUI KEONG**

MENTERI DI JABATAN PERDANA MENTERI

Tuan Yang Di Pertua,

1. Untuk makluman Ahli Yang Berhormat, perbelanjaan keseluruhan lawatan rasmi YAB Perdana Menteri dan delegasi ke Negara Republik Rakyat China pada 17 hingga 21 Ogos 2018 adalah berjumlah **RM961,631.68**. Kos perbelanjaan ini dibayar sewajarnya seperti mana termaktub dalam Akta Ahli Parlimen (Saraan) 1980 (Akta 237) dan perbelanjaan juga merangkumi perbelanjaan pegawai pengiring yang turut serta dalam setiap lawatan YAB Perdana Menteri.

2. Seperti mana Ahli Yang Berhormat sedia maklum, tujuan utama lawatan rasmi ini ialah untuk meningkatkan persefahaman hubungan dua hala antara Malaysia dan China dari segi perdagangan dan kerjasama ekonomi berikutan perubahan lanskap politik di Malaysia. Di samping pertemuan dengan pemimpin-pemimpin Kerajaan Republik Rakyat China, YAB Perdana Menteri dan delegasi juga turut mengadakan lawatan ke syarikat-syarikat terkemuka China dan pertemuan dengan ahli-ahli perniagaan.

3. Antara perkara yang dicapai adalah:

3.1 Kumpulan Alibaba telah bersetuju untuk berkongsi dan memberikan latihan kepada sektor Industri Kecil Dan Sederhana Malaysia terutama dalam bidang e-dagang dan penguasaan teknologi;

- 3.2 Proton Holdings Berhad dan Zhejiang Geely Holding Group pula telah memeterai *Heads of Agreement* yang merupakan perjanjian persefahaman pemindahan teknologi daripada Geely kepada Proton dalam teknologi tenaga boleh diperbaharui yang akan dapat meningkatkan mutu industri automotif negara di samping peluasan pasaran ke negara berkenaan;
- 3.3 pihak China telah menyatakan kesediaan untuk mengimport 500 ribu tan minyak kelapa sawit tambahan dari Malaysia dengan syarat harga yang kompetitif ditawarkan;
- 3.4 5 buah Memorandum of Understanding (MoU) dan Perjanjian antara agensi-agensi Kerajaan telah ditandatangani semasa lawatan tersebut. 2 perjanjian antara syarikat Malaysia dan China turut dimeterai dalam lawatan ini.

Sekian. Terima kasih.

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : Dr. Michael Teo Yu Keng [Miri]

TARIKH : 18 Oktober 2018

**SOALAN : Dr. Michael Teo Yu Keng [Miri] minta MENTERI
PERTANIAN DAN INDUSTRI ASAS TANI
menyatakan:**

a) Kawasan yang diisytiharkan wabak Rabies telah meningkat ke 41 kawasan dari Bahagian Kuching, Samarahan, Serian, Sri Aman, Betong, Sarikei, Sibu dan Miri. Memandangkan Negeri Sarawak sekarang mengalami keadaan krisis wabak Rabies, apakah langkah-langkah kecemasan yang akan diambil oleh Kementerian untuk menangani wabak Rabies di Sarawak; dan

b) Adakah Kementerian akan mempertimbangkan usaha untuk mendapatkan bantuan dan kerjasama agensi antarabangsa seperti Pertubuhan Kesihatan Sedunia (WHO) dan sebagainya untuk membantu kita mengawal dan menangani wabak Rabies yang kian merebak sejak tahun lalu di Negeri Sarawak.

JAWAPAN

Tuan Yang Dipertua,

a) Kementerian Pertanian dan industri Asas Tani (MOA), Jabatan Perkhidmatan Veterinar (DVS), Agensi Pengurusan Bencana Negara (NADMA) dan Kementerian Kesihatan Malaysia (KKM) telah mengadakan mesyuarat bagi membincangkan pelan tindakan kawalan penyakit Rabies di Sarawak dengan Timbalan Ketua Menteri Sarawak pada 2 Oktober 2018 di Kuching, Sarawak. Jawatankuasa Pengurusan Bencana Negeri Sarawak telah memutuskan mengenai strategi dan langkah berikut untuk menguatkan program kawalan dan pembasmian penyakit Rabies :

- i. mengadakan pertemuan dua hala antara Majlis Keselamatan Negara dan Pihak Berkuasa Keselamatan Indonesia untuk membincangkan kerjasama bagi mengawal pergerakan anjing yang lebih berkesan antara Sarawak dan Kalimantan, termasuk penyingkiran anjing liar di dalam kawasan *Immune Belt*;
- ii. pihak berkuasa tempatan diarahkan untuk menguatkuasakan undang-undang kecil mereka termasuk pelesenan anjing serta menasihati pemilik haiwan untuk mengurung anjing di dalam rumah;
- iii. mengadakan kawalan sempadan yang melibatkan Polis Diraja Malaysia (PDRM) dan Pasukan Gerakan Am (PGA) untuk mengadakan sekatan jalan raya dan menembak anjing terbiar 5 km selepas kawasan sempadan Kalimantan-Sarawak;
- iv. mengadakan sekatan jalanraya bersama-sama dengan agensi-agensi yang berkaitan dari semasa ke semasa untuk menghalang pergerakan haiwan. Adalah menjadi satu kesalahan di bawah Ordinan Kesihatan Awam Veterinar 1999 untuk memindahkan anjing peliharaan dari kawasan yang dijangkiti penyakit Rabies ke kawasan lain;

- v. kawalan populasi anjing liar akan dipergiatkan dan mengingatkan semua pemilik anjing untuk menjaga anjing peliharaan mereka disimpan dan dikurung dengan baik;
 - vi. pemusnahan anjing terbiar perlu dilaksanakan mengikut Bahagian-bahagian di Sarawak memandangkan keadaan geografi Sarawak yang luas. Operasi pemusnahan anjing terbiar turut melibatkan agensi-agensi yang berkaitan seperti Polis Diraja Malaysia (PDRM), Angkatan Tentera Malaysia (ATM), Angkatan Pertahanan Awam (APM), dan Jabatan Sukarelawan Malaysia (RELA) selain daripada DVS dan PBT;
 - vii. Sarawak telah mengeluarkan Perintah Penulanan Anti-Rabies dan juga memperhebatkan program vaksinasi untuk melindungi anjing yang bertuan. Sasaran suntikan vaksinasi adalah mencapai liputan vaksinasi 70% atau lebih. Sehingga kini, sebanyak 85,000 anjing telah disuntik di seluruh Sarawak; dan
 - viii. mengadakan kempen kesedaran awam dengan melibatkan Jabatan Penerangan Negeri Sarawak dalam menguar-uarkan risiko penyakit Rabies dan memohon kerjasama semua pihak dalam mengawal penyakit ini.
- b) Sehingga kini, Kementerian melalui Jabatan Perkhidmatan Veterinar telah bekerjasama dengan agensi antarabangsa antaranya, *World Organisation for Animal Health* (OIE) dalam memberi bantuan stok vaksin Rabies pada kadar yang amat murah berbanding harga pasaran. Adalah dijangkakan dengan kerjasama berterusan dari pelbagai agensi tempatan, penulanan penyakit Rabies ini dapat dibendung.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN AWANG BIN HASHIM
[PENDANG]
TARIKH : 18 OKTOBER 2018 (KHAMIS)

SOALAN NO. 37

Y.B. TUAN AWANG BIN HASHIM [PENDANG] minta **MENTERI KEWANGAN** menyatakan:-

- (a) berapakah jumlah sumbangan penderma kepada Tabung Harapan sehingga 30 September 2018 dan senarai penyumbang yang menderma RM500,000 ke atas ke dalam akaun Tabung Harapan ini; dan
- (b) bagaimanakah wang ini akan diuruskan.

JAWAPAN

Tuan Yang Dipertua,

a) Untuk makluman Yang Berhormat, sehingga 30 September 2018 jam 3.00 petang, jumlah terkumpul Tabung Harapan Malaysia adalah sebanyak RM194,308,703.71. Walau bagaimanapun, selaras dengan Akta Perlindungan Data Peribadi 2010, segalamaklumat dan rekod penyumbang kepada THM yang diterima oleh Maybank tidak dapat dihebahkan.

b) Bagi memastikan pengurusan THM ini adalah teratur dan telus, THM ditadbir oleh Jawatankuasa Akaun di mana pengerusinya adalah Ketua Setiausaha Perbendaharaan dan ahli-ahli adalah terdiri daripada wakil Bahagian/Jabatan di bawah Kementerian Kewangan. Pengendalian operasi Akaun Amanah THM ini adalah tertakluk kepada Arahan Amanahnya, Arahan Perbendaharaan, Pekeliling Perbendaharaan dan lain-lain peraturan Kerajaan yang berkuat kuasa. Pengurusan Akaun THM ini juga akan dikawal selia oleh Jabatan Akauntan Negara Malaysia dan Ketua Audit Negara melalui Penyata Kewangan Kerajaan Persekutuan setiap tahun.

c) Sebuah syarikat perakaunan antarabangsa juga akan dilantik untuk mengaudit THM. Akhir sekali, sehingga 16 Oktober 2018, 3 petang, jumlah sumbangan adalah RM196,066,276.16.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : TUAN HAJI WAN HASSAN BIN MOHD RAMLI

TARIKH : 18 OKTOBER 2018 (KHAMIS)

SOALAN : 38

YB Tuan Haji Wan Hassan bin Mohd Ramli [Dungun] minta PERDANA MENTERI menyatakan langkah keselamatan yang telah diambil oleh Agensi Penguatkuasa Maritim Malaysia (APMM) untuk memantau perairan negara khasnya di Laut China Selatan dari pencerobohan lanun dan nelayan asing.

JAWAPAN

Tuan Yang Dipertua,

Kerajaan amat memandang serius masalah pencerobohan nelayan asing di kawasan perairan Negara. Oleh itu, Agensi Penguatkuasaan Maritim Malaysia (Maritim Malaysia) sejak ditubuhkan lagi telah diberi tanggungjawab untuk menguatkuasakan undang-undang di Zon Maritim Malaysia. Pencerobohan nelayan asing di perairan Negara menunjukkan ketirisan kepada pendapatan negara. Oleh itu, Maritim Malaysia telah melaksanakan pelbagai tindakan penguatkuasaan seperti berikut;

- (i) Mempertingkatkan rondaan dan kehadiran di perairan negara dengan mengoperasi 7 hingga 10 vesel setiap hari di setiap Maritim Negeri sebagai langkah untuk mengawal isu pencerobohan nelayan asing.
- (ii) Pengoperasian 4 buah kapal kelas OPV (*Offshore Patrol Vessel*) di perairan Laut China Selatan dioptimumkan sepenuhnya untuk melaksanakan penguatkuasaan di dalam tempoh yang lama (*endurance*);
- (iii) Mewujudkan Program Sahabat Maritim bagi menjadikan nelayan sebagai mata dan telinga kepada Maritim Malaysia dengan menyalurkan maklumat yang tepat;
- (iv) Pengawasan melalui udara dari semasa ke semasa juga akan turut dilaksanakan bagi mengesan pencerobohan bot nelayan asing yang memasuki perairan negara; dan
- (v) Maritim Malaysia juga melaksanakan Strategi Lautan Biru Kebangsaan (NBOS) dengan agensi-agensi Kerajaan yang berkaitan bagi meningkatkan keberkesanan keselamatan di perairan Sarawak.

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 18 OKTOBER 2018 (KHAMIS)

SOALAN NO. 39

Minta **MENTERI PENDIDIKAN** menyatakan apakah cabaran yang dihadapi oleh Kerajaan dalam mengiktiraf Sijil UEC (Sijil Peperiksaan Bersama).

JAWAPAN

Yang di-Pertua,

Seperti yang pernah dijelaskan dalam sesi persidangan yang lepas, pengiktirafan *Unified Examination Certificate* (UEC) perlu diselesaikan secara menyeluruh dan tidak terburu-buru tanpa menjejaskan kedudukan dan kepentingan Bahasa Melayu serta perpaduan dan keharmonian antara kaum di negara ini. Penubuhan *Task Force* dilakukan untuk mengumpul maklumat dan input daripada pelbagai sumber dan perspektif dapat menyelesaikan isu pengiktirafan UEC.

Antara cabaran yang dihadapi ialah untuk mendapatkan pandangan daripada pelbagai pihak yang berkepentingan secara konsensus tanpa dipengaruhi oleh unsur-unsur dan sensitiviti perkauman. Hal ini demikian, kerana isu pengiktirafan UEC ini bukan sekadar isu peperiksaan semata-mata malahan melibatkan isu undang-undang, identiti nasional dan perpaduan. Sehubungan dengan itu, KPM amat mengharapkan agar semua pihak berkepentingan yang terlibat dalam proses pengumpulan maklumat dan input dapat berbincang dan mengemukakan pandangan dan cadangan secara matang dan terbuka dalam menyelesaikan isu pengiktirafan UEC ini.

RJM20

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' TUAN IBRAHIM TUAN MAN
[KUBANG KERIAN]
TARIKH : 18 OKTOBER 2018 (KHAMIS)

SOALAN NO. 40

Y.B. DATO' TUAN IBRAHIM TUAN MAN [KUBANG KERIAN] minta **MENTERI KEWANGAN** menyatakan status Tabung Harapan dan bagaimanakah duit itu akan digunakan untuk mengurangkan hutang negara.

JAWAPAN

Tuan Yang Dipertua,

Untuk makluman Yang Berhormat,

Sehingga 16 Oktober 2018 jam 3.00 petang, jumlah terkumpul Tabung Harapan Malaysia adalah sebanyak RM196,066,276.16.

Semua hasil derma dan sumbangan yang diterima oleh Tabung Harapan Malaysia (THM) akan digunakan untuk pembayaran hutang Kerajaan Persekutuan sebagaimana yang telah ditetapkan dalam arahan amanahnya.

Mekanisme pembayaran hutang negara menggunakan dana THM ini akan dirancang dan diperhalusi oleh Jawatankuasa Akaun Amanah THM agar proses pembayaran hutang tersebut dapat dilaksanakan secara teratur, telus, berintegriti mengikut peraturan dan perundangan semasa yang berkuat kuasa.

Walaupun THM tidak mungkin boleh melangsaikan semua hutang Kerajaan Persekutuan yang diwarisinya, THM akan kekal menjadi simbol semangat taat setia dan patriotisme rakyat Malaysia untuk melangsaikan hutang negara.

Sebuah syarikat perakaunan antarabangsa juga akan dilantik untuk mengaudit THM.

PEMBERITAHUAN PERTANYAAN
DEWAN RAKYAT MALAYSIA

PERTANYAAN : LISAN
DARIPADA : YB. DATIN PADUKA DR. TAN YEE KEW
KAWASAN : WANGSA MAJU
TARIKH : 18 OKTOBER 2018

SOALAN

DATIN PADUKA DR. TAN YEE KEW minta **MENTERI PERDAGANGAN ANTARABANGSA DAN INDUSTRI** menyatakan berapakah jumlah pengusaha Industri Kecil dan Sederhana (IKS) yang telah mendapatkan sijil halal dan sejauh manakah pengusaha IKS ini telah berjaya menguasai pasaran global.

JAWAPAN

Tuan Yang di-Pertua,

Sebanyak 4,434 pengusaha dari kalangan Perusahaan Kecil dan Sederhana (PKS) telah mendapat pensijilan halal sejak pengesahan pensijilan halal Malaysia diperkenalkan pada tahun 2007. Jumlah ini menunjukkan peningkatan yang positif setiap tahun dan secara tidak langsung membantu menjadikan Malaysia sebagai peneraju pasaran halal dunia.

Malaysia melihat potensi besar dalam sektor halal barangan pengguna terutamanya industri makanan, kosmetik, farmaseutikal bagi memenuhi pasaran tempatan dan menembusi pasaran antarabangsa, dalam menjana ekonomi negara dan sentiasa meningkatkan usaha untuk merealisasikan impian sebagai negara hab halal dunia menjelang 2020.

Dalam perkara ini, tindakan bersepadu daripada pelbagai pihak daripada industri yang ditunjangi PKS adalah penting untuk mencapai matlamat ini termasuklah mendapatkan persijilan halal yang merupakan instrumen terbaik dalam mempromosikan produk-produk keluaran PKS.

Tuan Yang di-Pertua,

Berhubung pencapaian pengusaha PKS di pasaran global pula, berdasarkan statistik oleh Jabatan Perangkaan Malaysia, nilai eksport PKS pada tahun 2017 berjumlah RM167.4 bilion, dengan sumbangan eksport oleh PKS secara keseluruhan kepada eskport negara sebanyak 17.3%.

Pelbagai inisiatif telah dilaksanakan oleh Kerajaan bagi meningkatkan kapasiti dan keupayaan PKS dalam aspek pensijilan halal dan menembusi pasaran global. Di antaranya termasuklah:

- (i) Program pementoran PKS melibatkan kerjasama strategik di antara SME Corp. Malaysia bersama Halal Industry Development Corporation (HDC) dan Nestle bagi meningkatkan keupayaan dan memastikan PKS berdaya saing di peringkat global. Program ini membantu PKS meneroka dan menambah pengetahuan untuk meningkatkan pulangan dan prestasi perniagaan PKS di dalam dan luar negara.

Secara umumnya, program ini menawarkan peluang kepada PKS untuk berkongsi, meneroka dan meningkatkan pengetahuan mengenai amalan terbaik dalam pengeluaran, penjualan, pemasaran dan peraturan mengenai tatacara berkaitan prosedur pensijilan halal serta panduan untuk menjadi pembekal kepada syarikat-syarikat multinasional yang menguasai pasaran dunia. Pensijilan halal ini dapat dimanfaatkan sebagai alat komersial dalam memasarkan produk PKS di peringkat global.

Pada tahun 2018, Program Pementoran PKS telah dilaksanakan di empat lokasi iaitu Johor, Sarawak, Pulau

Pinang dan Kuala Lumpur. Sesi ini telah disertai oleh 80 buah syarikat PKS dengan jumlah peserta seramai 110 orang. Sejak diwujudkan pada tahun 2010, sebanyak 570 PKS dengan 777 peserta telah menyertai mendapat manfaat daripada Program Pementoran PKS ini.

- (ii) Di bawah Pelan Induk PKS (tahun 2012 hingga 2020), terdapat program-program Berimpak Tinggi (*High Impact Programme*) seperti *Going Export* atau *Go-Ex* yang telah dilaksanakan oleh MATRADE bagi membantu pengeksport PKS memasarkan program baru di pasaran sedia ada atau program sedia ada di pasaran baru. Program ini juga bertujuan menangani masalah yang dihadapi oleh PKS dalam menembusi pasaran baru di luar negara berikutan kos pendahuluan yang tinggi serta kurang pengetahuan mengenai pesaing dan pasraan baharu.

Sehingga kini, sebanyak 287 PKS telah menyertai program Go-Ex dan telah menerokai 37 pasaran baru dengan menjana jualan eksport berjumlah RM402.55 juta.

Tuan Yang di-Pertua,

Menyedari bahawa PKS mewakili sebahagian besar daripada jumlah-jumlah syarikat yang berdaftar di Malaysia, Kerajaan akan terus komited untuk memperkasakan potensi serta daya saing PKS terutamanya di pasaran antarabangsa.

Sekian, terima kasih.

NO. SOALAN: 42

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : YB DATO' DR. SHAMSUL ANUAR BIN HAJI
NASARAH [LENGGONG]**

TARIKH : 18 OKTOBER 2018 (KHAMIS)

SOALAN : 42

Dato' Dr. Shamsul Anuar bin Haji Nasarah [Lenggong] minta **PERDANA MENTERI** menyatakan sejauh mana ketelusan agensi seperti SPRM di bawah Kerajaan Pakatan Harapan kini dilihat mengamalkan *double standard* bagi kes yang melibatkan pemimpin di kalangan Barisan Nasional berbanding Pakatan Harapan.

JAWAPAN: YB Datuk Liew Vui Keong,
Menteri Di Jabatan Perdana Menteri

Yang Berhormat,

Untuk makluman YB Lenggong, apa-apa tindakan yang diambil oleh SPRM adalah berasaskan laporan/aduan/maklumat yang diterima. Sekiranya laporan/aduan/maklumat tersebut mengandungi unsur-unsur perbuatan rasuah, penyelewengan atau salahguna kuasa, siasatan akan dijalankan di bawah Akta Pencegahan Rasuah Malaysia 2009. Bagi siasatan yang melibatkan ahli politik sama ada dilakukan oleh pihak parti Kerajaan atau parti pembangkang, SPRM tidak pernah mengamalkan *pilih kasih* dalam menjalankan siasatan. Sesuatu keputusan siasatan bergantung kepada bukti atau keterangan yang diperolehi semasa siasatan dijalankan.

Sekian, terima kasih.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATO' HAJI AHMAD NAZLAN BIN
IDRIS
[JERANTUT]**

TARIKH : 18 OKTOBER 2018 (KHAMIS)

SOALAN : 44

minta **MENTERI PEMBANGUNAN LUAR BANDAR** menyatakan program-program yang telah dirangka untuk dilaksanakan oleh Kementerian bagi membangunkan kawasan luar bandar dan masyarakat orang asli yang masih terkebelakang dari segi kemudahan prasarana dan pembangunan infrastruktur.

JAWAPAN

Tuan Yang Di-Pertua,

Untuk makluman Yang Berhormat, Kementerian masih komited untuk meneruskan program-program pembangunan infrastruktur luar bandar sedia ada seperti Jalan Luar Bandar, Bekalan Air dan Elektrik Luar Bandar dan Program Ameniti Sosial. Ini adalah selaras dengan hasrat Kementerian untuk mencapai 100% liputan prasarana luar bandar pada 2030.

Disamping itu, Kementerian juga sedang mengkaji program-program pembangunan kawasan yang baharu yang boleh diperkenalkan yang memberikan keutamaan kepada kawasan luar bandar terutamanya di 28 daerah termiskin di seluruh negara. Program-program ini yang bertujuan untuk meningkatkan taraf hidup penduduk di luar bandar termasuk masyarakat Orang Asli dengan mengambilkira iltizam didalam Buku Harapan di bawah Teras 3 iaitu 'Merencanakan Pertumbuhan Ekonomi Yang Adil dan Saksama'.

Selain itu, Kementerian juga dalam proses memuktamadkan Dasar Pembangunan Luar Bandar 2030 dan Blueprint Harapan Pembangunan Luar Bandar 2018-2023 dengan mengambilkira iltizam Buku Harapan tersebut.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : TUAN LUKANISMAN BIN AWANG SAUNI
[SIBUTI]
TARIKH : 18 OKTOBER 2018 (KHAMIS)

SOALAN NO. 45

Minta **MENTERI KESIHATAN** menyatakan adakah Kerajaan mempunyai cadangan untuk memperbesarkan premis Klinik Ibu dan Anak Taman Tunku atau berpindah ke premis baru yang lebih besar dan adakah langkah Kerajaan bagi masalah kesesakan Klinik Kesihatan Batu Niah dan adakah Kerajaan mempunyai garis masa (timeline) bagi pembinaan klinik baru di Pekan Sepupok Niah seperti dijanjikan oleh Kerajaan lepas.

JAWAPAN

Yang di-Pertua,

Buat masa ini, tiada cadangan untuk membesarkan premis Klinik Kesihatan Ibu Dan Anak (KKIA) Taman Tunku. Kedudukan KKIA Taman Tunku dan Klinik Komuniti Taman Tunku yang bersebelahan amat strategik dan sesuai untuk tujuan gunasama. Untuk makluman, tingkat atas premis Klinik Komuniti Taman Tunku telah disewa bagi membesarkan ruang operasi kedua-dua klinik tersebut. Klinik Kesihatan Bandaraya Miri Jenis 2 yang baru yang dijangka akan siap pada tahun 2020 bakal mengurangkan kesesakan KKIA Taman Tunku.

Permohonan pembinaan klinik baru di Pekan Sepupok Niah telah dicadangkan dalam projek pembangunan Rancangan Malaysia Ke-11. Walau bagaimanapun, bergantung kepada keperluan dan keutamaan keseluruhan, kelulusan serta kemampuan kewangan kerajaan. Pihak KKM sentiasa komited dalam memberikan perkhidmatan terbaik kepada penduduk setempat.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SIVARRAJAH CHANDRAN
(CAMERON HIGHLANDS)**

TARIKH : 18 OKTOBER 2018

SOALAN : 46

Dato' Sivarrajah Chandran [Cameron Highlands] minta **MENTERI DALAM NEGERI** menyatakan “*Standard Operating Procedures*” bagi pelaksanaan inisiatif memberi taraf kewarganegaraan kepada rakyat Malaysia (Pemastautin Tetap) yang berusia 60 tahun ke atas. Bagaimanakah inisiatif ini akan dilaksanakan dan berapakah jumlah orang yang sudah menerima kewarganegaraan hasil inisiatif ini.

JAWAPAN

Tuan Yang di-Pertua,

Berhubung dengan pertanyaan Ahli Yang Berhormat mengenai prosedur pemprosesan permohonan kewarganegaraan, dimaklumkan bahawa prosedur operasi standard (SOP) bagi permohonan kewarganegaraan Malaysia adalah berpandukan kepada senarai semak yang diperincikan daripada peruntukan di bawah Bahagian III, Perlembagaan Persekutuan serta Kaedah-Kaedah Kewarganegaraan 1964 (Pindaan 1996).

Bahagian III, Perlembagaan Persekutuan telah menetapkan tiga (3) kaedah pemerolehan kewarganegaraan Malaysia iaitu secara kuat kuasa undang-undang, pendaftaran atau penaturalisasian. Bagi warga asing, permohonan kewarganegaraan Malaysia boleh dikemukakan sama ada secara pendaftaran atau penaturalisasian.

Setiap permohonan kewarganegaraan yang diterima oleh Kementerian Dalam Negeri (KDN) akan diproses dengan teliti dalam memastikan setiap permohonan berkenaan memenuhi syarat-syarat perundangan yang ditetapkan oleh Perlembagaan Persekutuan. Syarat-syarat utama yang perlu dipenuhi adalah cukup tempoh mastautin sekurang-kurangnya 12 tahun dari tarikh pegangan MyPR dan telah menunjukkan niat untuk bermastautin, mempunyai pengetahuan dalam Bahasa Melayu serta mestilah berkelakuan baik. Beban untuk membuktikan kelayakan untuk dianugerahkan kewarganegaraan Malaysia ini adalah di bawah tanggungjawab setiap pemohon.

Setelah selesai proses pertimbangan dan jika permohonan diluluskan, pemohon perlu hadir ke pejabat Jabatan Pendaftaran Negara (JPN) dengan membawa surat kelulusan yang dikeluarkan sama ada oleh KDN atau JPN untuk prosedur mengangkat sumpah dan membuat bayaran pengeluaran Sijil Kewarganegaraan. Setelah Sijil Kewarganegaraan

dikeluarkan, pemohon akan layak bergelar sebagai seorang warganegara Malaysia.

Susulan daripada pengumuman YAB Perdana Menteri pada 14 Ogos 2018 mengenai penganugerahan kewarganegaraan kepada pemegang Kad Pemastautin Tetap MyPR berumur 60 tahun dan ke atas yang telah memenuhi syarat yang ditetapkan oleh Perlembagaan Persekutuan, KDN sedang melaksanakan tindakan segera terhadap arahan berkenaan secara berperingkat dan selaras dengan peruntukan perundangan di bawah Perlembagaan Persekutuan.

Buat masa ini, KDN dalam tindakan menyelesaikan isu kewarganegaraan individu berketurunan India selaras dengan Manifesto 100 Hari Kerajaan dalam pilihan raya ke-14 baru-baru ini dan KDN telahpun selesai memproses semua permohonan kewarganegaraan daripada individu pemegang Kad Pemastautin Tetap MyPR berketurunan India berumur 60 tahun dan ke atas yang telah diterima dari tempoh 2013 sehingga Mei 2018 berjumlah sebanyak 1,667 permohonan. Pengeluaran surat keputusan kepada pemohon akan dilaksanakan secara berperingkat oleh pihak Kementerian.

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN HASANUDDIN BIN MOHD YUNUS
[HULU LANGAT]**

TARIKH : 18 OKTOBER 2018 (KHAMIS)

SOALAN NO. 47

Minta **MENTERI PENDIDIKAN** menyatakan status gerak kerja pemansuhan Akta Universiti dan Kolej Universiti.

JAWAPAN

Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah mengadakan sesi *facts finding* secara berterusan bersama pemegang taruh iaitu pengurusan tertinggi universiti awam, staf akademik, alumni, wakil persatuan kakitangan akademik, penasihat undang-undang dan orang awam untuk melihat persepsi dan kesediaan untuk memansuhkan atau meminda AUKU.

KPM telah menubuhkan empat Jawatankuasa Kerja yang berperanan untuk menyediakan input atau draf kandungan baru AUKU dan menyelaraskan laporan berkala dan pembentangan kepada Jawatankuasa Teknikal Pelaksanaan Pemansuhan atau Pindaan AUKU. Jawatankuasa Teknikal akan menyelaraskan, mengkaji dan menyemak peruntukan berkaitan yang terdapat dalam AUKU secara menyeluruh dan kemudiannya mengemukakan cadangan kepada Jawatankuasa Induk. Kesemua ahli Jawatankuasa ini dianggotai oleh ahli akademik,

bukan akademik, penasihat undang-undang, wakil pelajar dan wakil persatuan yang merupakan pemegang taruh universiti awam dan swasta.

Bagi pelaksanaan jangka pendek (quick win), KPM telah bersetuju untuk membatalkan peruntukan yang menghalang pelajar terlibat dalam aktiviti parti politik di dalam kampus (Seksyen 15(2)(c) Akta Universiti Dan Kolej Universiti 1971 [Akta 30]) yang dijangka dibentangkan di Parlimen pada sesi Disember 2018.

Pindaan AUKU ini dilaksanakan bersekali dengan Akta Institusi Pendidikan Tinggi Swasta 1996 [Akta 555] dan Akta Institusi-Institusi Pelajaran (Tatatertib) 1976 [Akta 174] yang mempunyai peruntukan sama terpakai kepada Institusi Pendidikan Tinggi Swasta, Politeknik, Kolej Komuniti dan Institut Perguruan Malaysia.

KPM juga telah menyediakan satu garis masa tempoh pelaksanaan pemansuhan atau pindaan AUKU dimana ia dijangka akan dibentangkan di parlimen selesai dilaksanakan pada Disember tahun 2020. Satu kajian menyeluruh bagi melihat kesemua akta yang berkaitan dengan pendidikan tinggi dan sistem tadbir urus pendidikan tinggi yang bersesuaian akan dilakukan.

RJM22